



頤芳集卷之十一目錄

節婦詩

古歙初菴汪啟淑選

王瑤湘 五首

朱氏 句

王湘真 一首

鄧氏 一首

吳貞閨 三首

徐栢 一首

蔣婉貞 三首

王氏 一首

沈貞順 二首

張氏 一首

鈕魯氏 二首

張氏 句

李孟昭 三首

袁杼 五首

江銘玉 九首

薛氏 句

范貞儀 三首

焦氏 十首

徐幽貞 一首

李因 七首

汪玉英 九首

擷芳集卷之十一

古歛訥莽汪啟淑選

王瑤湘

廣東南海縣人蒲衣子王隼之女也適李孝先

著有逍遙樓詩

觚臙番禺隱士蒲衣子王隼生而善病癯體鶴
立結深廬于西山之麓者二十年夫人潘氏通
史漢諸書樂貧偕隱字之曰孟齊有女瑤湘能
詩擇婿得故孝人子李孝先遂妻之蒲衣子性嗜
音常自度曲孝先倚而和之瑤湘吹洞簫以赴
節雨闌更靜則聲發深廬中聽者有月笙雲瑛
之想未幾孝先卒瑤湘矢節自稱逍遙居士蒲
衣為刻逍遙樓詩梁太史藥亭寄示瑤湘書云
聞瑤湘讀書余甚喜余與汝祖若翁交凡兩世
矣視汝一如己子故甚望于汝之成也余有女

龍端少汝一歲頗聰慧余授以詩上口卽能背
誦而余性懶不能常授以此龍端之學不及汝
聞汝近讀漆園南華南華之文章善幻而其言
道也必邈乎未始有道其言物也必主乎齊齊
而列以不齊之狀總歸于化善讀南華者當知
之又讀禮經禮經漢白虎諸儒之所著也二戴
大小夏侯各師其傳然不越天下國家朝會燕
饗嘉勞贈答儀文縟節至言閨門則禮之節蓋
謹矣更讀離騷楚臣屈原不得于君發爲奇文
香草美人芳蘭君子三湘九疑之間左倚桂旗
右攬揭車汝誦之倘亦有恍焉如見者乎余何
時得來汝父西山見汝于涑廬使汝將所讀書
各誦一遍俾我泠然稱善也觀太史書精深雅
麗其寄示當在瑤湘未字孝先時瑤湘非奇女
子何以得此
于藥亭哉

咏懷

僻性好神仙學縮麻姑髻麻姑挈我遊窈窕雲之際綵

繚藕絲裙旖旎芙蓉帶滿把瓊瑤花吹落人間世雙鸞
舞紫霞雌雄聲嘒嘒玉琯譜鸞鳴和以千秋歲

涑廬雜咏

滅燭罷瑤琴倚闌看月落白露霑羅裳徘徊聽殘角流
雲盪幽草松風驚野鶴陣陣蕙蘭香藥圃烟漠漠寂寂
伴蟲吟幽懷誰可託

秋琴

美人秋札至貽我金徽琴一鼓離鸞曲誰人知此音寒
霜譜哀調淡月洗孤心何事王孫女千秋遺恨深

獨夜

殘燈明滅裏遙夜夢醒時起立庭前樹孤懷澹月知

擬送別

孤舟暮歸去別路江南樹煙外有鐘聲故人在何處

朱氏

字與里次俱未詳句見森玉堂詩草附註云孀

友也

句

晚霞斜照小樓頭

王湘貞

浙江嘉興縣人侍郎張天植之妾

臨終詩

自入君門乍幾年今朝賫志下黃泉倘逢女伴相呼問

同是前生未了緣

檣李詩繫王湘貞嘉興兵部郎張天植之妾張被逮湘貞同眾妾蘭若章蘇淑裂帛作小楷寄張以

死

鄧氏

福建漳平縣人適蔣元和夫亡死節

龍巖州志鄧氏漳平縣庠生鄧鯤變之女五歲通論語誦唐詩年十二習女紅纂組工緻每讀王婉容滿江紅詞及文山和句濡睫潛然蓋憐其薄命也十九適蔣元和未期而元和天哀毀忘生夫家故貧且無子父母欲奪其志給之歸氏度不免卽粧次服鉛粉召庶母來告以故并

嗚其歸葬夫家語畢而絕蔣族昇歸與元和同
穴其父爲之銘曰上歸無夫下歸無子不歸來
歸首邱此土此土維何上有籬竿下有潺湲籬
竿之貞潺湲之清維貞與清更千秋兮以與爾
鄰幽宮

病起

抱恙窮居久廢詩閒牕坐對雨絲絲簾垂忍阻歸巢燕
不許清風入戶吹

吳貞閨

字首良江蘇吳江縣人適曹村金敗工詩善琴
守節撫孤兩世

秋水

港上日多雨夜來新水生西連洞庭曲南過越王城野
艇二三泊愁人日夕行晚風漁浪起落日枯槔聲

讀葉昭齊詩

願假青燈力尋君愁恨篇身何隨命薄名豈受人憐秋
冷長門雁春啼湘水鶉如予遲暮在心折畫屏前

春暮

簾影漾清波空庭鳥自過楊花三月雨青水綠萍多

蘇州府志生員金敗妻吳氏名貞閨字首良工詩
書法道勁尤精琴理年二十五敗卒有孽子生甫
兩月寄乳在外貞閨親撫育之至授室
復歿嗣孤半歲復撫之守節垂四十年

徐栢

浙江海寧縣陳湘山之妻也年二十二而寡撫
育遺孤貧至不能舉火詩雖淺近而志則可嘉
見志詩

二十青春不見天身穿麻絰淚漣漣孤子生來纔週歲
公姑早已背堂前

家貧夫死不勝悲鬻子恩勤腸百迴枯井汲泉來路斷
有如孤雁落荒隈

細葉菖蒲果是稀盆中石上立根基人人笑我根基淺
綠葉青葱不帶泥

海昌外志陳之芳妻年二十嫠居翁姑早世遺孤
僅一歲絡緯蓬戶中貧不克舉火子長娶婦而天

又撫孫爲授室所遇最屯蹇嘗賦
詩見志云云方古栢舟何遜焉

蔣婉貞

字清暎江西廣豐縣人蔣謙之女

題一片石傳奇

百計思量泪眼空戰船催逼向江東酒樓夢裏分明聽
斷碣猶存矮屋中

數尺殘碑濕泪痕江邊人靜哭黃昏梨花二月城西路
似有靈旗掩墓門

豐碑四尺倚江濱細雨斜風墓草新謗語傳訛今始雪
受他貞魄拜詞人

王氏

浙江諸暨縣人適同邑陳賓夫亡殉節

絕命詞

王氏稟公婆不孝無他志許夫同歸去不願在陽世乞

葬夫之傍連理黃泉地週氏母衣糧結報天親意

諸暨縣志貞烈王氏陳賓妻年十五子歸王固名族陳亦詩禮傳家女紅之暇好以詩書質難遂通箴管能詞句甫五載夫染疾氏奉侍惟謹賓疾劇囑氏曰爾素知大義奈我兄弟蹉跎汝既無子彼利我財必不相容請改圖以終餘年母使我泉壤遺憾氏嘿不應適畫工傳夫容畢氏請同譜入畫圖既成色喜語夫曰此我同歸意也殆疾革殯殮成禮舅始議繼嗣即前所謂蹉跎者子也氏從容步於靈筵者數匝回顧無人潛登小樓投繯自盡始家人覺則已氣絕矣衣裾間有題云云聞者莫

不悲歎

沈貞順

字筠操

孫貞媛詩

紀配懷梁媛千秋擅令名試看貞女傳勝讀麗人行貞

女從來有誰同孫蕙卿蕙卿方稚齒干戈家國傾一嫗

獨慷慨仗義撫遺嬰十載藏淮浦嬌雛羽翼成老人恩

未報落籍來蕪城章臺穢芳躅花塹誓捐生懺盡紅塵

孽乘風朝玉京我亦歌黃鵠因君勵赤城

次韻題明妃圖

捲地黃沙黑霧稠邊城日日冷於秋漢王殺壽曾何益
依舊宮人赴隴頭

張氏

福建安溪縣人陳孫思之室

題壁

獨守冰霜十二秋因將嗣繼忍身留乾坤此際應裁決

免使貞魂劍下休

福建續志張氏陳孫思妻幼讀書識大義歸未久夫歿即投井家人救免誓為立嗣丙辰有寇患氏呼兄與決題壁云云遂投繯而死
池北偶談甲寅閩賊作亂有陳某妻張氏早孀撫孤十二年矣賊至題詩壁上有句云乾坤此際應

自訣遂雉經思南守陳君某為作傳

鈕呼魯氏

滿州正白旗人福建巡撫愛公必達之女也適

工部員外伊嵩阿早寡即擬身殉夫伯永中堂

貴以弟妹齒幼苦勸撫育守節十載待弟娶妹

嫁從容自經死

永貴奏疏為奏聞事竊臣胞姪已故員外郎伊嵩阿少失怙養撫如已子於乾隆三十六年繼娶原任總督愛必達第十女為妻甫經二載不幸早寡當臣姪病篤時臣姪婦親侍左右朝夕無倦醫藥罔效乃割肉以進未愈而亡臣姪婦隨欲身殉因救得免臣彼時即同伊父愛必達諄切諭以汝夫弱弟未婚幼妹未嫁前室遺有二女諸事皆仗汝照料汝但盡心存孤即與殉

夫無異且汝夫臨終亦曾囑汝死節不難存孤
為難臣姪婦遂哭泣留生誓以數事完竣必欲
殉節臣留心看其十年以來守節持家辛勤備
至先為夫弟完婚次將夫妹及兩女先後出嫁
料理始終堅貞不變凡內外親族均無間言今
忽於三月十七日壁間留詩二首遂完節自盡
臣身係滿州世受天恩不敢循例咨報部旗
以冀旌獎謹繕摺奏聞伏乞
皇上睿鑒為此謹奏奉
旨加恩准其旌表欽此

絕命詞

數年弟妹意殷勤恩德難酬志未伸家事盡裁從此去
遺詩題壁別諸親魂歸地下前因了名在人間萬古春
取義成仁今不愧殉夫素志始知真

別弟妹

別却塵寰不記秋此行聊有數言留一身孤子宜加意
家事紛紜要預籌骨肉貧時須顧恤姻親久後益綢繆
承先裕後誠難事節儉終為遠大謀

張氏

江蘇江都縣人宜黃令李應高之妾也李令卒
雉經於室

寄父母句

他年魂返江南路惟聽春山哭杜鵑

江辰闈六文集李小妻者何江都張氏四妹宜黃
令李君應高之妾也妹之父揚州衛籍緣鼎革家
漸落當歲歉石米錢二千其家斷炊烟者已數日
妹誓鬻身以活父母方允志已決適宜黃令李君

乏嗣李父時為兩淮運判藉友人以禮為媒由江
 都載入宜黃官廨未幾若翁下世李令奔喪廣陵
 挈家至浦口或勸妹從之東下歸寧父母妹曰奔
 喪大故也妾若與俱將不畏多言為尊君累李令
 遂赴喪妹隨其內子徑歸解梁已而李令扶櫬歸
 里又二年病且篤妹誓以身殉家人防之頗密遂
 不言死舉止自若忽於殯李令之先一夕閉戶自
 經時康熙二十三年甲子十有一月二十六日年
 甫一十八歲先是妹幼即聰慧能默誦女孝經女
 訓亦頗知書法既歸李令不復言及次浦口始一
 索筆扎以寄父母書有句云云
 卽是兒魂歸時也聞者淚下

李孟昭

山西翼城縣人袁州知府李允性之長女也適

浮山張培本張死守志著有懷清臺詩鈔

李節婦孟昭傳孟昭翼城縣人壬戌進士袁州府知府允性長女也幼喜讀書愛談忠孝節義

事工八法徑五六尺字尤奇古歷隨父任年廿
 七始字浮山張君培本時丁母憂太守欲遂嫁
 之孟昭曰衰經行禮吾不願為亦不忍為卒終
 制年三十歸張氏不二年稱未亡人一子及晬
 而殤取姪為夫後課讀如嚴師居恒足不履戶
 外日誦宋五子性理近思錄等書性不喜為詩
 然落筆輒高妙天機自在筆姿離奇闖然入漢
 魏之室菊坡郎中培本從祖叔父也出孟昭集
 屬予點定因
 為其傳畧云

有鳥二章章六句

有鳥有鳥啾啾夕陽風吹籬花觸我心傷為誰之傷母

兮早亡

有鳥有鳥啾啾夕陽風吹籬花藥綻且芳心之憂矣車

輪轉腸

仲春遊南河花園

二月踏青去滿園春色鮮梅花千樹雪楊柳一林烟不
欲把樽酒無心聽管絃徘徊憶古句更咏栢舟篇

袁杼

字綺文浙江錢塘縣人知縣袁枚第四妹適松

江韓思永早寡依兄枚於隨園以居著有樓居

小草

袁明府枚四妹韓孺人墓志銘四妹名杼幼孤
潔避人而樓居族黨之以賸臘來者諸姊見妹
不見獨嗜典籍文史有所吟輒端書之丐予改
削或得古人奇句逸事必擁髻走報相誦說為
娛嬉嫁松江韓思永思永遠遊妹聖宮滌器而
坐雖奧潔所一櫺一几驟拭之光可以鑑兒執

玉天稟絕異髫年入泮見者異目視之未幾天
亡妹假墓于其室未幾思永亦亡妹歸其喪又
未幾西鄰災中隔長河有火鳶從空飛燿其居
灰其器用財賄執玉之柩燬焉妹儼然無歸挈
一女來隨園又未幾死年五十六嗚呼妹自兒
亡後十年中災害並至如有物焉暗齧齧之至
于再至于三極之于其所往死而後已誰使然
耶誰能知其所以然耶予聞同一地也黍谷獨
寒同一草也荼獨苦邃古以來歷萬萬歲石可
泐金可銷獨此一寒一苦之性至今天不能回
也而况于人乎况于婦人乎余女弟二人三妹
之命之窮業已作傳狀其事矣四妹之命之窮
又復如是豈為予妹者例定不祥哉不然何以
至此歿後哀其詩若干附素文秋卿之後將與
劉家三妹共頡頏焉某年月日歸妹柩借思永
葬西湖而哀以銘曰行踽踽真靜女奈其愁居
懾處非泣不語有兄如我而不能
救汝嗚呼命矣夫嗚呼恨矣夫
嚴長明樓居小草題詞謝氏庭餘蕙草芳秋來
一夕萎元霜心香賸得無多子欲賺清愁萬斛

償書堂石散竟虛論歷劫終難悟夙因斷紙零
縑數行字也教了却一生人爲還靈櫬傍湖隈
自鏡明流自寫哀莫訝愁腸成九曲栢舟親泝
武夷來移住平泉歲月長自憐身世小滄桑歌
成黃竹怡王母誰料翻添兩鬢霜掌上珠堪抵
月光無端飛去墮青霜傷心再世重相見直認
泉臺作故鄉嬌女韶齡似左家春風獨活影交
加零星母教都能記一朵時簪白柰花三尺秋
墳寄一棺屬君策取傍陽山他時寒食梨花夜
定有吟魂數往還小字斜行刻意搜紙牕燈火
付吟求竹枝慘戚梅梢
冷併作殘年一段愁

病危作

黃泉原舊路重證昔時因未了三生事公然五十春傷
心遺弱女回首別慈親若箇營齋奠難兄作主人

除夕十二韻

除夜分陰貴關心看夕陽西山多暮景東壁愛餘光擔
盒家奴走蘋蘩主婦忙兒童尋爆竹梢柶暖壺漿未掃
三冬雪重添兩鬢霜椒花明日獻鍼綫此時藏有意思
前夢無情撇故鄉淒風欺紙敗守歲慮更長歎息平生
事低回九轉腸射屏愁弱女戲綵慰高堂燭盡春寒至
星稀曙色蒼一從鸞鏡碎不對曉簾妝

悼亡

會記當年賦別情眉牕分手說歸程三秋有雁空懷想
兩載辭家隔死生舊僕已隨新主去征衣分散客囊輕
欲圖夢裏模糊見慘雨淒風夢不成

不寐

暉暉明月轉西廊寂寂宣爐一炷香替掩雙扉風作主
代翻空櫃鼠求糧為尋古字書抽亂多繡繁花綫放長
欵枕不須人睡穩恐教殘夢覓家鄉

哭子

風搖燭影雨昏昏死後醫師空到門玉碎竟成千古恨
蘭枯忽斷十年恩半生薄福吾何望蒲榻遺文爾尚存
伏枕猶憐吟句苦黃墟無路覘殘魂

沈大成次韻詩蕙歎芸焚淚不禁一封事迹繼哀
吟它時亦抱童烏痛異地還傷庾信心殘燭寒鐘
悽客夢破窓急雨接春陰含毫
更憶黔婁婦若悼殤兒恨轉深

江銘玉

字愨君號愨齋江蘇元和縣人適同邑汪蘭芬
年十九稱未亡人著有愨齋組餘

張書勳節母江孺人傳節母名銘玉字愨君為
故太學生汪君蘭芬德光元配汪君本節母父
謙菴公諱景帆之宅相也君家世通顯父輩十
六人多仕進君欲紹其家聲勤讀書雖多疾弗
少休文譽藉甚而艱於一衿遂援例入國學戊
午辛酉兩赴省闈不遇志益勵疾益甚遂鬱鬱
以歿歿年二十一節母以十七歲于歸至是結
禱甫二載耳琴瑟方調遽操別鶴撫棺長慟志
不欲生勺水不入口者七日舅姑既悲其志而
虞其固乃謂之曰汝夫無子將徐為似續計藉
汝撫延之設汝又死是重絕汝夫也對之大慟
於是節母知不可死乃稍稍就飲食越二年德
光仲兄廷準始生道盛甫彌月即為之後自是
而仰事俯育萃於一身節母愈不可死矣體素

羸經哀毀後益不支始猶間進藥餌迨舅姑相繼歿而子舍亦既成室且抱孫乃時自語曰吾今不負吾夫矣即有疾恒自諱蓋不欲醫藥之療之者將以從初志也病劇為子若婦所強不得已進一二劑輒麾去不復御至是卒卒之日內外上下哭失聲莫不屈指其行事以稱其賢節母少知書好吟咏皆其父諱菴所授在室時事父母至孝厥後諱菴以困窮廢目嗣子復幼時時迎養以終其身所作詩曰憐齋組餘能抒寫性靈不獨為流連光景之什其子道盛梓以行於世

光祿王鳴盛憐齋組餘序江夫人憐君十七而歸於汪君蘭芬十九而夫亡以叔之子道盛嗣守節二十七年而卒女紅之暇賦詩見志故名其集曰組餘道盛謀刻請序於余發而讀之其辭大率悲哀危苦者居多斲彼女貞之木繼以寡女之絲彈為別鶴之操夫人之詩當作如是觀昔蕭統徐陵所錄閨幃之作遠不具論若唐之上官昭容魚元機宋之李清照朱淑真輩共

才思綺麗艷稱人口然此特統絳兒郎搔頭弄姿者所樂稱耳夫人於飲冰茹蘗之餘抒性靈成吟詠豈徒掇拾金粉作旖旎態者所敢望哉可恨者浮艷之詞易於傳播若窮簷孤嫠幺絃偏韻從寒燈機絞啼弔月中吐露幽光轉眼漸滅螢乾蠹死玉碎珠零誰復揭而表之元遺山中州集采詩為史俾後門寒素與臺閣制作並列簡編其法甚善予撰苔岑集附以女士亦欲搜遺剔隱旁見側出以寓予意行將錄夫人之作並登諸梓又歎近代人筋骨脆弱血性埋沒見於文詞者芒角磨泐都盡不得已而思或奇氣鍾於閨閣者尚可旁采以見於文字中稍稍增長氣色而亦不多觀又生長吳中柔軟地見時下好玉臺香奩油頭粉面語益復悶悶不絮聒茲得夫人之意耳顧子聞道盛嘗從容請為夫慘狀差快人意耳顧子聞道盛嘗從容請為夫人乞旌典夫人正色曰婦人守節分內極平常事安用矜張輕瀆官長為吁斯言也士大夫見必能工詩而不求名刻之者道盛為人子之心

也選之者予輩闡微之
志也於夫人何有焉

讀小學

冬缸夜無寐開卷時靜對敬讀內外篇如聞師氏誨豈
惟爲少儀終身恐不逮白璧疵其瑕素絲治以類執玉
與奉盈書之鏤瓊珮

報罷後作

君不見綠綺自昔珍焦桐良材乃出竈下爨又不見漆
園寓言紀鯤鵬搏風六月息者暫會應變化自有時無
爲惋憤空長歎抱玉還聞祇再朝明珠豈惜終投暗賈
生對策前席虛馬援功名晚成看從渠此日外孫山要
待他年卿子冠正須努力加餐飯茂陵秋雨莊鴻案

盆松歌

掄材首標徂徠松貞心首揭十八公一髮綠來幾年歲
之而鱗鬣擊青空只今盆盎見孤峻架得虬枝轉清勁
齋前楚楚亦可憐碧染秋烟梳月徑春花金粉墮釵股
翠粒皴皮凌冬令獨愁白石少茯苓施枝女蘿無並命
稜稜骨瘦不滿肥落落長根有本性何時一破蒼烟開
翻濤謾謾流風迴竦身直上一千尺爲招華表鶴歸來

禮佛

歛衽學和南晨昏白玉龕欲知生後果只向靜中參別

掛芳集 卷一 四
鵲應難返茹荼自覺甘但留方寸地結箇小茅菴

月夜獨吟

幽棲曲室似巖阿最愛臨牕伴素娥獨坐不嫌寒褚薄
孤吟惟覺楚聲多半庭竹影和詩瘦一縷茶烟却睡魔
惟有月明知我意相看遑問夜如何

上塚

不多伴侶挈垂髫豈是行春撥短橈一水滌紆心曲曲
四山颯沓樹蕭蕭紙錢欲與魂俱化淚血都和酒共澆
爲語孤兒休喜躍黯然歸路轉無聊

夜月

月入空庭映素幃蕭蕭落葉打牕扉不知今夜重泉裏
涼冷何人與換衣

聞鐘聲

敲落寒牕月幾楞機絲一段冷於冰而今更悟聲聞諦
緣覺空來是上乘

霜橫月落病愁中聽徹寒山曉寺鐘早有身心清淨地
本來無覺亦無空

薛氏

浙江山陰縣人適同邑祁民瞻結褵一載民瞻
卒氏絕粒欲死姑勉慰之乃矢志養姑以清節

著聞

句

兩行珠淚同流水一片冰心付落花

楊錫紱節婦傳薛氏山陰薛沒存女年十七歸同邑祁民瞻一載而民瞻卒氏痛哭絕粟幾死姑再三諭以若殉夫如舅姑何乃矢志守節後有諷改適者氏引刀刺面哭曰吾忍死為堂上老舅姑也肯更適為禽獸行耶自是無敢言再醮者初習針黹度所獲不充朝夕乃刻苦習紡績舅慕遊東粵氏與姑處極孝養少讀書知詩有句云云閨閣間皆傳誦之

范貞儀

字一栢江蘇如臯縣人適同邑貢生高纒七歲即能吟詠纒故苦節撫孤著有愁叢集惜未之

見

如臯縣志范氏名貞儀故貢士高纒妻明經高深之冢媳也生而敏淑七歲即能吟詠女紅之暇潛心經史及笄適纒克佐夫子先意承志乃翁有女中顏閔之許未十年姑死夫死翁死并庶姑長子死遺幼叔三幼子二熒熒孤子兩世無依疾風暴雨不寒而慄氏一弱女子身任其責亦危矣哉氏能拮据捋荼智以防外嚴以肅內喪葬婚嫁措置得宜課叔教子皆得入黌序而登仕藉是以嫂比母以母代父無忝厥德矣著愁叢集自言生平之坎坷實非有意求工而其精誠憂憤躍躍紙上令人感歎而欽服焉節孝完人無出其右

蘭塘曲

放權向蘭塘共愛芳心淺折斷藕中絲雖長不及蘭

春日經理綠雪山房

掛芳集 卷十一 六
荒館經時未啓扉眼前烟景與心違頻逢風雨花應瘦
久廢刪鋤草漸肥小閣香泥巢乳燕短牆蛛網挂春暉
伯勞底事東飛去春晝年年未見歸

對鏡

匣裡青銅久閉藏暫時相對轉心傷飛蓬欲化三秋草
瘦骨真成百鍊鋼香閣夢迴山月冷玉臺人去鶴書荒
薛媛欲寫丹青寄天上人間恨渺茫

焦氏

安徽宣城縣人諸生陸鑑明之室也陸溺於博
貧極將賣焦於土豪黃姓焦知之作絕命詩十

章雉經死有司題旌兼罰黃姓金爲置祠而

令陸生守之

絕命詩

風雨淒淒暗感傷鶉衣不耐五更涼揮毫欲寫衷腸事
提起心頭便斷腸

風吹庭竹舞喧譁百轉憂心空自嗟燈蕊不知成永訣
今宵猶結一枝花

獨坐茅簷積恨多生辰莫奈命如何世間無數裙釵女
偏我微軀受折磨

暗啟柴扉只自知我今視死已如歸傷心獨有呢喃燕

來日牕前各自飛
人言薄命自紅顏
我不紅顏命也艱
留下青巾絹一幅
兒夫看取淚痕斑

是誰設此迷魂陣
籠絡兒夫暮作朝
身倦囊空歸臥後
枕邊猶聽自呼么

焚香寶篆告蒼天
默佑兒夫性早遷
菽水奉親書教子
妾歸黃土亦安然

調和琴瑟不相依
妾命如絲已斷微
盼望兒夫身早出
牀頭幼子守孤幃

滄海桑田尚變遷
人生百歲總歸泉
寄言堂上宜珍重

切莫愁哀損大年

爲人豈不惜餘生
我惜餘生勢不行
今日懸梁永別去
他年華表敘離情

徐幽貞

江蘇崑山縣人適同邑顧秀才某

寄兄集唐

并序

寂寂窮鄉哭哭室
終朝閉戶春亦如
秋永晝垂簾日還疑
夜遑問園中樹茂
應悵寄生何知
陌上草薰惟悲獨
活心摧天殞曹文
叔故自無兒腸斷
星孤任子咸空云
有女鴛方拆翼埋
魂魄以沉沉雁復
離羣就稻梁而僕
僕于是星披月戴
悵兩地之相違蓬
轉萍漂嗟一枝其
誰惜漫作無家之
別詎逢有道之交
歷下亭邊望齊烟
而杳靄岱宗岩畔
瞻吳馬以迷離躑
躑舟車

徒歎袍穿鳳尾蕭條書劍敢希炙啖牛心空尋
 舊雨於東平洪州牧生還無望幸挹高風於武
 定白司馬共醉有情乃值名賢實為親串經綸
 內蘊俾勿節之風流文藻高騫等平原之秀逸
 昔資入告翻紅藥而題詩今以來旬擁碧幢而
 建節第恐雲泥間隔詎接寒流冰雪操持那容
 熱客豈意垂青歛白餘芬不吝於齒牙遂令泛
 綠依紅小道可伸其指掌謂藥籠之當備俾方
 技以得施從此日暖窮途阮籍何須發慟春回
 岐路楊朱不復銜悲雙魚正見其來游孤鳥已
 欣其安集是堪慰矣抑有陳焉瓦全皆賴玉成
 實感提攜之德外樂寧忘內顧還思家室之艱
 先人之馬鬣未封伯氏之牛眠無兆閨中膏沐
 既奩罄以難容膝下栗梨復盤空而奚覓嗟乎
 三年不見徒看天末之雲千里遙思豈識夢中
 之路望衡峯之雁影可得迴飛聽蜀棧之鶉聲
 不如歸去但使錢留囊裏甘作鄉人休教金盡
 牀頭空悲壯士才慙鮑女奚堪明遠之過稱志
 等班昭竊冀仲升之遄返倘令濯擢雲湖發歸
 興於鵲山之麓何必傳書雷岸示離情於蜺水

之濱無任幽悰統希明鑒
 聊緝舊帙用寄新愁云爾

別館春還淑氣催

李 愷

鶯花隨處作愁媒

李咸用

空懷遠道無持贈

許 渾

安得好風吹汝來

李商隱

鶯聲不散柳含烟

包 何

鏡裏今年老去年

郭 勛

陌上歸心無產業

耿 滄

每逢寒食一潸然

趙 嘏

良人早歿諸孤癡

杜 甫

對此如何不淚垂

白居易

始覺浮生無住着

李 頎

慇懃為爾唱愁辭

鄭 谷

白髮新添四五莖

薛 逢

三年踏盡化衣塵

趙 嘏

餘生尚在艱難日

耿 滄

自歎空閨夢寐頻

宋之問

李 因

字是菴號龕山女史浙江錢塘縣人光祿卿海昌葛徵奇之妾也能詩善畫嘗從游宦者十五載光祿以憂憤卒四壁蕭然至不能舉火因矢志栢舟初終弗變躬親紡織或時寫丹青以自給著有竹笑軒吟稿

海寧縣志李因字是菴光祿葛徵奇側室也善畫名重京師吟咏間作有竹笑軒集行世圖繪寶鑑李因字是菴杭州人海寧葛御史無奇夫人善水墨花鳥鴛鴦尤稱得法游翔舉集均得其當枝葉蕊朵亦俱生動陳維崧婦人集海昌女子李因字今生號是菴作水墨花鳥幽淡欲絕王吏部嘗題其芙蓉鷺絲畫云寒入金塘花葉孤非烟非雨態模糊姚家女子丹青絕寫作芙蓉匹鳥圖姚月華小傳

嘗作芙蓉匹鳥也李是菴光祿無奇夫人著有竹嘯軒集又以節著無聲詩史李因者葛無奇之侍姬也字今生寫花卉柔婉鮮華得徐黃遺意無奇亦善山水曲房靜几互以圖繪為娛無奇嘗語人曰山水姬不如我花卉我不如姬其自為評隲如此無奇名徵奇

池北偶談近日婦人工畫者海寧李因是菴善畫松鷹及水墨花竹翎毛江陰周禧善人物花鳥其妹祐與之韻頗義鳥倪仁吉秀水黃媛介皆工山水木石桐城方維儀工白描大士珊瑚網李因武林葛無奇侍御家姬李是菴山水寫生俱擅長國朝畫徵錄李因字今生號是菴會稽人海寧光祿卿葛無奇妾也能詩有竹笑軒吟草續稿工花鳥得陳白陽法嘗刻沉香為白陽像奉之畫多水墨蒼老無閨閣氣名甚著世以因與鷹相類遂傳以為專長畫鷹故假名規利之徒多鷹松迄今猶然也陳洪綬有侍妾故淨鬢者亦

善花鳥
草蟲

舟發溇縣同家祿勳賦

拂衣去去急白髮半愁中過客天涯少行厨楫柁空禪
關山月黑魚柵夜燈紅松菊聞無恙鋤書可耐窮

秋江晚泊和豫章李夫人韻

石尤風急泊沙灣日落寒江鷗鷺閒秋水空明千里月
荒烟暝鎖萬重山樵歌野唱猶行路僧寺殘鐘獨掩關
潦倒篷窓愁客夢漫披詩史手重刪

鷺嶺山莊尋秋

十丈懸崖掛薜蘿叅雲風頂見嵯峨閒搜怪石秋林晚
獨聽殘鐘曉月過黃葉山前人跡少白雲天際鳥聲多
冷泉亭下潄潄水不許漁舟唱棹歌

春日家祿勳聞命南歸感懷作

欲賦高軒過門前到者稀楊花衝幙入猶落故人衣

京口道中卽事

雲暗篷牕晝啟遲綠陰新覆樹枝枝明珠買得潯陽女
一曲琵琶古別離

長安秋日

高樹秋聲入夢遲夜來風雨簟涼時季鷹自解歸來好
縱乏蓴鱸也動思

哭介龕祿勳公

秋聲風急閉重關
淚寄瀟湘踈竹斑
莫問蒼梧多少怨
至今石化望夫山

汪玉英

號吟香安徽歙縣人
予長女也適同邑內閣中
書洪榜早寡在室著有吟香榭初稿于歸後著

有瑞芝室詩鈔

柳汀隨筆新安為大好山水之鄉其間老生宿儒人人有集間氣所鍾即閨閫亦多翹楚之秀汪駕部啟淑長女玉英有吟香榭初稿其枝蔓檢厥菁莪如春日句云一縷沉烟消永晝半簾花影漾微風樓望句云一繩遠雁羈人思數點青山故國心春恨句云心共芭蕉渾不展淚

如楊柳鎮長垂早春句云晴日烘梅香意逗春風拂水碧紋圓即事句云石松少土偏饒翠盆藕無花却有香聲調風格非粘脂滴粉者所可擬也

翠香閣曉望

晨曦散嵐烟危閣試遐矚
宿霧積山腰巖鷗吼虛谷飛
瀑鳴高岑巖石淨如沐
坐久豁塵心把卷耽幽獨

冬閨曲

朔風獵獵號窗紙檻外寒梅初放蕊
山容待臘意蕭條
日落東牆移短晷俄焉一鏡升中天
清光照入疎簾裏
坐看樓頭斗柄斜了東銀漏聲遙起

賦得孤月當樓滿

皎皎晴空月清輝照綺樓鑒帷光乍滿入戶景偏幽銀
燭渾輪燄珠簾穩上鉤凭闌忘夜永如到廣寒遊

野望

縱目煙郊外陰沉宿雨收癡雲迷野樹空翠撲行舟瑟
瑟寒飈勁霏霏落葉稠閒聽松竹裏歸鳥語啁啾

梅花

壓盡羣芳久擅名冰肌玉骨信幽貞香魂合伴林和靖
妙賦終推宋廣平驛使傳來春漏洩羅浮夢醒月斜橫
瓊姿應是瑤池種寄語騷人莫浪評

寄外

三接瑤箋承遠記發函伸紙淚滂沱心同水荇千絲結
愁逐江楓八月波寂寂漏長成寐少迢迢夜永較寒多
最憐腸斷思君處不解君情意若何
相見時難別更難悽情祇暗淚闌干驚聞斷續蟬聲切
倦看參差雁影還欹枕欲成千里夢薄衾無奈五更寒
誰知此後相思苦盡日羞容整綠鬟

初堂洪榜和內寄懷詩坐咏行吟彼澤波芙蓉采
采涉江沱風塵回首山中日烟水難分天際波詩
裏共稱思想久夢中猶是別懷多欲知彼此情何
似請看雲鴻意若何舊事新情欲話難夜深星斗
正闌干幾回尺素將書至頻問刀頭那口還春在
絳帷應識暖風生翠袖獨知寒為君寄語嫦娥說
香霧何年見寶鬢

春陰

游絲懶不飛春雲何漠漠綉倦倚朱闌時見庭花落

秋夜

月轉廊腰露氣涼漸移花影盡東階挑燈獨自焚香坐
吟罷新詩玉漏長

擷芳集卷之十一終

擷芳集卷之十二目錄

貞女詩

古歛訥菴汪啟淑選

宋景衛 一首

曹炯 三首

凌存巽 一首

錢氏 句

顧季繁 句

吳氏 一首

周珊珊 二首

王氏 一首

梁指妹 句

席氏 一首

胡秀温 八首

姜桂 一首

陳寶娘 句

徐源 二首

張靜懿 一首

董氏 一首

張婉琛 四首

徐氏 一首

何志璇 六首

石氏 一首

徐文琳 一首

汪芹 句

趙婉揚 六首

聞璞 三首

擷芳集卷之十二

古歙訥菴汪啟淑選

宋景衛

字茂漪江蘇元和縣人許字生員程樹未婚樹

卒女矢志歸程守貞

黃太史之雋宋貞女詩題詞不為鳳凰之和鳴而為寡鵠悲而孤雁唳是貞女之命也宋郡丞敷倫以女景衛許配程司訓訥菴子樹為妻未嫁而夫死嚮使不死而一以高門才子一以世家女博士閨房講習倡和之樂當何如而安得有上父書姑病顛天疏之刳肝為紙滴血為墨也者而安得有弔陳烈婦百韻詩之引六經以立鐵案援同志以證冰操也者唯既死而後貞女歸其家而居其室而後碎金屑玉稍流傳親戚間所謂哭者之心豈可想也而或因其名謂

若衛共姜之節因其氏而謂若宣文君之學
若若華若照之才而歎美之非貞女意也

丁巳春讀西河陳烈媛傳知為明檢討五生後裔

源遠流長經學不墜感賦七字韻如易卦之數

慙非經生聊以所知質之冥鑒不足云詩也

禮義廉恥四維立綱常名教萬古植無愧於口無愧身

無愧於心尤汲汲節語婦人再醮嗟身污若乃未婚心

每惑一身那可容二心心失難云身勿失卓哉陳媛毓

名聞五經先生蘭芽苗媛為五經先生繼之十二世孫習禮明詩幼字

林桃天未賦所天卒烈女不肯更二夫相從地下尋靈

匹見者哀號聞者悲大吏上言採訪實旌門表墓佇恩

榮文人詩歌盛細帙嗟予抱璞稱未亡傳聞益覺增悽

惻間嘗讀書考五經管窺易象參彖翼男女睽而其志

通已字未娶可推測坤道含章利永貞從一而終恒其

德苦節悔亡不卽嗟安節之亨甘節吉人心道心辨危

微精一危微中允執動罔不凶德二三終始惟一臻厥

極忠貞世篤緬家聲祖考無忝躬自飭先高祖巡按山東殉節詩

經三復柏舟篇髣彼兩髦我儀特斯人去也矢靡它勿

匿初心矢靡慝在室自誓首共姜聖人取為後世則郝

鄒諸儒闡說殷郝仲興鄒肇敏俱云共姜未嫁顧麟士采入詩經說約死同穴而

穀異室柏舟齊女中壘編乍至城門衛訃急保母請還

置罔聞竟入持喪表衛國

詩傳闡邱栢舟云朱子以為婦人詩引列女傳為證宣姜

不淑甚矣安知非即共姜也按劉向本文止稱齊女不云衛宣夫人或後人標題之訛耳凡未適人

許嫁矣春秋經傳標特筆僖公九年書伯姬何休公羊

洞經術字而笄之待成人繫屬於人養貞一明與未字

之女殊原貞援引曝書集

朱竹垞為高蔣氏作原貞引以為論

女而不婦

貞為行盲左穀梁弗沿襲共姬比例聖所褒堯峯南昀

說堪億

家既庭先生女字於計未婚殉節汪堯峯作誌以共姜比例彭南昀為子從伯母吳孝貞誌銘

即踵之許嫁纓為禮記文名以行媒遂相識兩家齋戒告

鬼神壹與終身不改革娶有吉日未成婚夫死亦如婿

弔泣女服斬衰往夫門

曾子問注疏

未嫁服同已娶式婦人

不二斬謂何天不二耳儀禮悉嫁殤遷葬禁周官謂彼

生未紅絲繫

周禮媒氏注謂生時非夫婦

聘則為妻納采徵即守夫

死不嫁律可服可往明可從愛人以德休姑息舉世昧

經謂過中此旨不明道幾熄人求盡倫安能過五倫只

恐常不及由來夫婦比君臣策名亦有未受職清風孤

竹師夷齊商朝未祿周恥食孔子稱仁記震川自異前

論分揚抑

歸震川初作貞女論抑為非禮之正後作張貞女記以孔子仁夷齊揚之

推觀子

弟事父兄豈必一一親顏色父子繼絕或背生兄弟前

後或南北追思孝友自性成非緣見面乃盡力朋從尚

友及神交寧須把臂投膠漆揆此可知婦與夫性真相

感當循率殷勤何必同衾幃曹植句問名已定羞羞忒只

知以義勿以情身潔心安理亦得幼從父母最初言初

命是遵戒私暱不悖於理日無違許嫁之語由親出弗

虧其體弗辱親立志不渝貴在必奪則隨亡不奪存志

不可奪命則畢愧存不若無愧亡幾希人禽謹出入守

貞殉烈易地同一心不二絕矯飾卓哉陳媛大節彰浩

然正氣兩間塞傷悲自署望門寡門在望兮未許即既

云寡矣難再雙茲言至正非偏刻鵠甘獨宿歌三年鵠

告雙飛媒一逼遂將性命付輕綃僅留心事傳遺墨視

死如歸豈博名舍生取義寧圖逸香銷一旦折芳枝石

化千秋留勁質維媛家學五經明察於倫理昭作述天

經地義今古垂永永幽光爭日月

小粉場雜識江蘇元和縣貞女宋景衛字茂漪幼習禮工詩許字生員程樹未婚樹卒貞女歸程守貞不復輕作遇節烈事間一發抒嘗作陳烈女詩有云由來夫婦比君臣策名亦有未受職清風孤竹師夷齊商朝未祿周恥食初未歸程時聞姑病亟刺指血書疏籲天請代其節孝蓋天性也樹字玉生年十一善屬文補長洲縣學生有神童之目以哭大父得疾卒人皆惜之

曹炯

字重光直隸天津縣人及笄而卒著有非非集

題愛蓮亭

面水一亭在臨風繞菱荷香消長日暑色借醉顏醜隔

浦樓文鳥方橋引素波徘徊何限意竚聽採蓮歌

遊仙

九天天路路迢迢閩苑奇葩盡吐苞憶得看時忘日暮
歸來新月掛松梢

朝來洞口飯青精晚侍金仙宴玉京憶得昨宵松下坐
月明星朗聽吹笙

凌存異

江蘇上海縣人字嘉定金惟驪未婚惟驪卒存

巽卽矢志自經

凌璿玉家姪女貞烈傳畧貞女上海人姓凌氏
名存異族弟康之第六女也幼婉順知讀書親

疾輒弗寢年十五許字膠邑金尚東子惟驪丁
卯春金氏子亡女聞訃心悲暗泣數日兩目盡
腫父母問之以病目對遂託佞佛不茹葷衣縞
素歷歲餘如一日母嘗以榴花簪之稱疾而臥
拔花置几上蓋其用心堅苦如此戊辰中元有
親戚為議婚者父欲許之女晨起禮佛過內堂
微聞其語女心益悲容弗戚飲食如平常家中
莫之疑也俗於是日賽邑神夜經其門或勸女
出觀女不應二女婢侍側以計遣之乃闔樓自
經死年十八時乾隆十三年七月十五日也
喬承頤輓烈女凌存異詩桃夭猶未賦秉節非
其職而能以身殉大義稱獨得視死竟如歸乃
在弱女子豈無父母念保貞不惜死

遺詩

鞠養恩難報此身愧歉多紅顏原薄命盡瘁莫生波

上海縣志凌存異父名康幼婉順知書年十五許
字金惟驪未婚惟驪卒女聞訃暗泣目盡腫詰之

以病目對遂託佞佛縞衣茹素年餘戚有議婚女
微聞遂自經歿年十八啟遺篋得詩數章其一云
云可謂從容就義者從叔如
煥為之傳旌表祀節孝祠

錢氏

浙江桐鄉縣人字嘉興縣某氏子未婚聞訃自
經以殉

句

不隨桃李鬧春風

朱琰朱絲歎小序朱絲歎為錢貞女作貞女桐鄉
人許字嘉興某氏子未婚夫亡女以父老無子誓
終身不嫁奉親焉除簪珥去華飾已一年矣突有
委禽者女知父意不可回題絕命詞即以原聘紅
絲自經聞而義之因為作此俟采風者詩曰艷艷
朱絲繩相牽始成匹成匹亦其常何心立奇節奈

以同功絲不作同心結通名未相見一朝便永訣
雖未結同心蚤以誓同穴泣涕奉朱絲躊躇顧白
髮相持不敢言相依亦暫活皎皎閨中心明明天
上日心與日光明不隨月盈闕朱絲繫生死朱絲
寧斷絕突來隔幔人欲以攀枝葛養父事不終守
義志難奪背面辭阿父報恩在專壹緣以朱絲成
命以朱絲畢桃李紅日薦朱絲未
許涅絲絲見素心嗟哉女貞潔

顧季蘩

浙江桐鄉縣人府學生員顧漢之女也字烏程
縣學生張九彰夫死殉節

浙江通志顧季蘩桐鄉人幼慧通書史事母至
孝許字張九彰未婚夫故悲號欲殉兄時新日
夜守之適翁張廷芝來奠祖母家人咸在喪次
季蘩遂閉戶自經理其衣俱紉結不可解檢其
笥得絕命詩等篇伊翁日擊傷心迎柩與夫合
厝焉康熙十一年撫院范承謨題

十一歲

許濬顧烈女詩序烈女名季蔡湖州府學生顧漢第四女也生而端慧女紅之暇兼精筆墨字烏城縣學生張廷芝之子九彰彰韶齡苦志羸疾而卒女聞訃驚慟死以自矢有所親媼慰之曰幸未至張門女且哭且叱曰我生平用一器一席尚不欲妄更况此身乎未幾顧有大母之喪張翁訂期設奠女是日飭裝若有所待翁至即好語給女伴出觀翁方捧爵靈几女已絕縵高閣矣檢其遺篋有絕命詞句云云字字悽惋讀者咸歔歔太息殮之日弔奠者數百人兩翁遂議合葬以成其志殉節時年二十一歲康熙九年三月上巳日也

董漢策顧貞女季蔡傳顧貞女季蔡者歸安之瑤莊人也蔡父為章始挈家遷於桐邑之清溪蔡幼秉禮教勤女紅不苟言笑少長從母氏授經書卒業遂工詩賦事母姚暨祖母沈備極孝敬許字平江張九彰善病兩姓媒始或議婚嫁輒以病阻今年庚戌仲春蔡既失祖母愈益悲

閏二月之二十有三日九彰聞訃顧君悲之甚或告顧君曰是子病久庭矣今捐館舍雖痛悼將如命何蔡在幕次實聞此言哽咽垂絕保母曰夫婿雖歿幸未成婚不猶愈乎蔡乃起立作色曰是何言歟我生平坐不易席食不更器爾言胡為乎來哉蔡於是憬然若有懼也以死自誓哭不休諸姊妹察其意良不善遂晝夜與其起居數日蔡稍稍霽顏色咸謂蔡意已解伺察者稍引去三月三日蔡之翁張君來致祭於蔡之祖父母初陳几筵諸兄姊妹序事喪次蔡退息小樓保母侍蔡曰爾盍觀彼奠爾一告我保母察蔡無戚容遂至廳事祭甫畢返命與諸姊妹偕來俄聞有聲出簷間如墜如壓扣其戶扃不納俯窺門隙則見衣裳委於地眾咸驚從簷上排窓櫺以進諦視則蔡死矣蓋雉經也發其篋得所著薄命賦絕命詩等皆哀惋不可卒讀

句

憔悴綠牕人事改寂寥簾外竹聲清
爐烟夜半香魂斷月魄沉餘玉色輕

吳氏

安徽歙縣人許字叢睦汪某夫死守貞

歙縣志吳氏吳正通之女許字叢睦汪某擇吉期之前一月汪以疾卒女聞訃即毀妝絕粒登樓將墜而死家人從後挽之得免父母諭之日兒能養親即守義矣何必效爾姑往事乎蓋女之姑亦未嫁而以烈殉夫者女自是決計養親終身逾年有媒妁為議婚者女焚香祖祠前盡截其髮浮議乃息奉親二十年調羹視膳不離左右母病刲股以進其後父母繼歿女哀毀骨立屏絕葷酒酷嗜書史能為詩女紅之妙一時稱絕卒年四十有七

秋夜

風勁霜凝蛩語淒月移竹影過廊西篆香銷盡渾無寐
呶嗶俄聞報曙雞

周珊珊

字小玉

縣人黃雲孫聘姬也未嫁而

殞

獨立

忽有悲秋意空階獨立難愛看雲所歷遙憶露將溥人
意三更怯花情五夜安歸鴉棲不定纖月過林端

題紅葉

何處相思字吳江一葉楓東流知不誤莫使逐西風

王 氏

江蘇無錫縣人許字金兆年夫死殉節

絕命詞

生為金氏人死為金氏鬼天也不諒只一死豈不偉

江南通志王氏女無錫人許字金兆年女年十四聞夫病歿即投繯殉母覺救甦後父母欲改字之女大書一紙於臥室几上云云遂投井死

梁指妹

廣東高要縣人梁鏤明孫女周頌聘室未婚周

卒梁以身殉

句

身歸黃土魂猶在骨化寒灰志尚堅

皇華紀聞梁指妹高要人舉人鏤明孫女受儒生周頌聘頌年二十未婚而卒妹聞訃更素衣為位而哭晨昏不輟明年小祥日哭罷盛飾登樓自經留詩云云父母歸其柩與頌合葬

席 氏

江蘇長洲縣東山人也

七十二峯足徵集氏東山人幼許婚郡城某氏子貧而無行年長不娶所親者諷以就親山中而此子出不近人情之語女聞大恨題詩數首自經死武山周武功記其一絕於長青集中

絕句

冥判重泉路未通萬行血淚洒西風孤魂漂泊歸何處
宜向清風明月中

胡秀温

湖北荆門州人胡振翼之女許字江陵諸生張

毓參未婚毓參病故胡即守貞撫嗣子著有筠

心閣詩

江南通志胡貞女荆門胡振翼女幼許字江陵
生員張毓參年十八已定婚期參病歿凶問至
女絕食累日乞往弔遂留張宅撫姪旋均為後
事舅姑備極孝敬守貞三十三年康熙五十六

旌年

戴俊胡貞媛傳畧胡氏名秀温江陵諸生張毓
參聘妻荆門胡公振翼女也夢古栢一株偃蔭
庭中生貞媛幼即不妄言笑伯氏作梅官太史
封君就養京邸晤張左司馬可前深器其季子
毓參遂締盟越三年叶吉將成禮張子竟以病
卒時貞媛年纔十八耳訃至投纆者四絕粒者

十有一日父知不可強聽往唁匍匐於夫之墓
不肯歸封君再三泣勸之乃返迨司馬致政家
居而飲冰茹藥者已十有三載矣司馬以猶子

旋均為之嗣撫育藐孤嗶咿聲與機杼相間發
著有筠
心閣詩

吳家騏筠心閣詩序畧江陵貞母張孺人封少
宗伯吳公之女少許字左司馬張公子毓參臨

嫁參病歿誓死不貳服衰經哭於其墓父母勸
之歸縞衣茹素歷十三年舅姑義而迎之為置

嗣子恩勤教育嗣子亡又撫孫振鐸而教之年
五十有司請於朝旌表之如制今年六十有

九矣振鐸輯其筠心閣詩郵置京師請序於余
余讀而悲焉孺人生長名族夙嫻詩禮受張之

聘守從張之義哭其夫哭其舅姑又哭其嗣子
遭罹變故慘悼憂傷卒能不移其守以式穀其

後人其詩纏綿悱惻皆天倫至性之所發豈椒
花柳絮之儔所可同日語哉昔人以高明之性

比伯夷叔齊之義流覽篇章景行
行止採風者所當亟為採錄也

玉壺舟中勵志詩

茲山何嶙峋茲水何澄澈山堅不可磨水清不可涅嗟
哉薄命人蓬閨縈未結忽來破鏡凶永作死生別微軀
那復珍拚同朝露滅堂上特鍾情永夜俱環列從容顧
兒言阿兒何太決豈謂能輕生遂命閨中傑張氏上有
翁暮年垂耄耋張氏下須嗣枯樹滋萌蘖惟難在立孤
而易在死節斯言豈不然毋乃多周折老淚日未乾苦
口日未輟委順白髮心匍匐臨衰經樽酒奠良人肝腸
寸寸裂瑤琴絃未張高曲已終闕生未結同心死當瘞
同穴何以報良人凜此三寸鐵登堂拜舅姑鬢髮雙鬢

雪入室撫孤兒熒熒一點血仰事俯育閒何忍輕棄絕
甘心茹荼苦黽勉完名烈我聞古媧皇隻手補天缺

盆魚

磁斗注清泉風皺波紋細荇藻勢縱橫白小於茲憩唾
影更唾香首尾胥牽綴含睇故窺人飄忽爭引避尺水
儼蹄涔亦似鳴得意安知有潛龍飛躍無涯際

聽伯氏蒼頭話從軍故事

風峭霜收黯淡天饑烏啞啞聚空田蒼頭曾侍將軍帳
細說先臣苦向邊初出居庸關外路氊帷櫛比儼市廛
他鄉况味誰云苦晨可炊今夜可眠歸化西去六千里

大漠遂爾絕人烟終朝罕見禾麥影經歲不聞雀與蟬
塞馬黃羊遍地走豺狼狐豕相摩肩行李稍孤單此物
恣摧殘骨骸棄草莽肝腦飽饕餐黃雲慘淡白日寒極
目傷心良可歎更值悲風動地來白草畢偃沙漫漫車
爲之折轅馬爲之盤旋行人盡蹲伏未敢舉目看征夫
不幸當此際忘却生人樂與歡及渡瀚海三百里沙深
數尺車陷軌遙遙累日絕泉脉馬駝革囊囊裹水一掬
解渴勝金莖安敢縱情厭泥滓牛羊活剝並血吞饑來
唯覺甘如薺天兵戾止似星羅外藩臣庶胥角犄獨憐
食飲異中華心脾失調半不起斯時阿奴亦臥病猶幸

將軍身無毀軍中芻糗積如山麾下貔貅皆死士飲醪
恩重令更嚴驅策真如身臂指佇看澤旺授首歸圖畫
麟閣銘清史無何將星中夜落哀聲呼號振軍壘天柱
摧今日減光大樹飄零軍無紀萬里孤櫬沙漠歸黃昏
哭向角聲裏駝躑躅馬不前地老天荒憾無已我漫聽
之悲重來手足情切心繁哀一身許國四十載半生品
望重三台西清起草成珠玉東閣招納盡賢才寅清遐
溯古人踪講幄從容和鹽梅無端小醜抗天子居然邊
庭肆無禮鄩侯受命總儲胥誓將不負 聖君使孤忠
徒激功未成賺得沙場長沒齒

拜先姑章宜人墓

稽首瞻荒草酸心奠一觴
夜臺雖永隔慈範總難忘
未覩羣鳥集空餘獨燕翔
沒存無限恨松栢亦淒涼

白燕

霓裳舊舞認依稀影掠銀河
獨自飛未許東風消雪羽
不嫌冷露透冰肌春秋夢繞
瑤臺路出入身穿玉女機
試問營巢何處是輸他白首
老霜闌

藕塘

一泓深且清約畧似秋浦
拾得藕如船還憶蓮心苦

詠史

轎車未入漢宮門蓮勺何人識
至尊只有夏蟲差解事
青青柳葉寫曾孫

菊花

芳菲女節燦東籬正是三秋欲暮時
雨妬霜欺渾未怯
寒英抵死抱初枝

姜桂

字芳垂一字士霜號古研道人山東萊陽縣人
孝廉姜本渭季女許嫁張氏子未婚張卒桂遂
矢志通經善畫人有得其片楮點墨者珍踰球
璧焉

閨秀尹瓊華題姜貞女畫詩空閨工六法取勢
入微茫野渡漲秋水遠山明夕陽古心無麗藻
澹墨有冰霜不點雙
飛鳥圖中斷頡頏

題畫

暖風晴日值良辰窗外梅花數點新更想林泉清淑致

山光樹色寫初春

國朝畫徵錄姜桂字芳垂號古研道人孝廉本渭
季女行人垓曾孫女也父母許張氏子聘未婚張
卒桂時年十九聞訃欲自經父母許其守節乃不
死未幾翁姑相繼歿無可歸矢志於室貞女也通
經書善畫山水乾筆疏秀嘗見其小幅自題云云
又記云仿元人惜筆法惟舊紙得墨始有氣韻佳
紙難覓大幅更罕茲幀細潔又平拓者再而紙性
猝難融化淺深濃淡頗費經營而筆不達意欲貌
似古人而不可得多愧觀此
足以知其學力有所得矣

陳寶娘

廣東海陽縣人字同邑黃士振未婚夫死雉經

以殉

句

奔喪違妾願迅步逐郎踪

鹿州初集廣東海陽縣人府小史陳子穎女幼聰
敏有弟讀書輒旁觀成誦通孝經內則年十二字
邑人黃士振士振夭卒寶娘時在機失梭昏仆坐
地拊膺慟哭請奔喪父母不許遂絕飲食旋自經
瓜架間雖甚雨衣裙不霑翼日形神不改於篋內
得遺詩一首有句云云時康熙壬午二月廿有二
日也後漳浦藍鼎元
王霖為立陳烈女傳

徐源

字方白號冰谷浙江嘉興縣人字沈某未于歸
而沈卒遂矢志茹荼苦者數十年如一日著有
詩集

采芝山人招遊■園

元絲不可染薄命不可移撫心出門去歸時仍攢眉我

友特相憫挈遊錦水湄

園後有錦帶河

名園巧營構彷彿瀛洲

奇峰巒競俛仰亭榭互參差石榴照簷楹芍藥擁堦墀
穿雲招舞鶴踐花逐驚麋頓忘足力倦但覺心神怡惟
時方初夏綠陰逗微颺主人重文墨惠茗索新詩率爾
遂成篇俚鄙還自嗤

詠艾虎次韻

詎假斑斕炫色新靈叢變化顯威神嘯呼有象童能甲
攫搏無心鬼自寅應爲時清離苑囿豈因善政渡河津
五絲未縛存芳烈獻瑞祥麟未得臣

張靜懿

江蘇丹陽縣人張灝之孫女也許同邑汪廷颺
未婚而卒

斷腸吟

父母育我身詎意我命劣未賦天桃詩遽洒分鸞血景
仰戴女山時慕共姜烈人生當如是何分今與昔痛欲

自隕滅親恩念罔極長齋繡佛前苦行甘茹藥翁憐我
年少我念姑半百既失繞膝兒願為不字媳留得伶仃
驅聊代供子職莫謂樂艱楚只因惜名節說與斷腸處
斷腸說不得吁嗟數行句猿聞亦涕泣

丹陽縣志張貞女名靜懿郡庠生樸之女順治壬辰進士灝之嫡孫女也幼喜讀書每見孝女節婦傳輒欽慕曰人生當如是年十三母病女割股雜參苓飲母病以痊許字同邑汪廷颺颺以父嬖妾而虐其母抑鬱成疾垂死女請往永訣母不可欲自盡乃許之往視一見而瞑留執喪未幾父勸之歸歸十餘年復往省姑親戚咸語其舅媳為若子守宜少分與貲產舅性鄙而狠溺愛妾子反欲嫁媳以免分財若不能旦夕容者女念進退俱不可夜自經姑寐而驚急救甦里黨忿其舅欲訴之官女告日以兒故許翁短他日何以見其子於地下乃已歸母家歲時必設奠望空致祭有斷腸之句

云云一時紳士多歌詩以弔之

董氏

董嵩年諱臻耆之女也字某未嫁而卒著有蘭賢齋集

草堂月

一輪光照草堂前萬里無雲翠作天縱有踈星虛點染
滿庭花影倩誰憐

張婉琛

永州司理叅軍張兩銘先生之女也字李某未
婚而天遂守貞日以針黹自給筆墨消遣然不

輕易示人

咏鐵線蓮

清姿瘦質可憐生鐵骨偏宜君子名寧向三春獨顛顛
不同紅紫鬪輕盈

誰把仙家綠玉花繫將鐵線委泥沙移根擬傍青蓮地
九品香中未有涯

送表妹王婉瑛于歸楚

簪花印格共南樓忽復分攜淚暗流從此唱酬夫婦在
不知還憶阿儂不

東風歸雁惜離羣柳色青青此送君消受何郎書卷福
不須惆悵隔荆雲

徐氏

浙江嘉興縣人大司馬徐必達之女孫適庠生
陳耆卿陳殉父中丞公難氏僅十六齡截髮矢
志守節二十二年而卒著有孤筠吟草

洗心亭

萬个琅玕寫雨聲洗心亭畔水常清肝腸久已同冰雪
只合臨流去濯纓

何志璇

字韞潔號琢齋江蘇華亭縣人字馮太學子尚

賢未婚守志著有輜篋存稿詞話彙編詞家紀

事

江南通志何貞女志璇華亭人字韞潔五歲能以意識奇字許字馮尚賢馮卒女聞訃卽素衣涕泣累日夕母兄勸止之謂曰雖許字猶未嫁無重傷老人心女曰馮之婚父所議也若更議婚死我父也母兄遂不復言年

廿八卒工詩詞有輜篋存稿

吳昌祺節女何氏傳畧節女何氏華亭人名志

璇字韞潔自號琢齋母錢孺人夢青鸞降庭而生節女賦性超異四歲祖母吳太孺人口授唐人詩輒成誦能以意識奇字遠宗故與太學生

馮子景修有舊姻才其仲子尚賢以節女許字遠宗歿五年而尚賢補博士弟子銳意進取庚

午秋闈後以疾卒訃至秘勿告也節女微聞之立褫紈綺服布素聲不聞而涕洟瀾母兄懼其

哀瘁交口勸止乘間謂曰汝父已早世我惟若

兄妹是賴若雖議婚猶未聘也別訂姻好於義

為正何固滯若此乃重傷我心耶節女曰對馮氏之婚父所議也今而更議死我父也兒讀古

人書知從一而已且兒不出閨門奉母以樂餘

年顧不足慰母心耶其兄志齋太學生有才識

謂節女曰母所欲者在妹有家今觀妹盛年終

日縞素庸勿怍怍乎且國家定例未婚者弗旌

而徒虧承志奈何節女曰吾豈為名計耶母欲

吾有家而家亡矣兄寧不能分片席容一妹以

佐承歡而顧思違父命也悲泣欲絕母與兄皆

相持而泣其後慕義求婚者踵至母不內聞也

兄不外許也聞者亦相戒不敢復請無何而錢

孺人復嬰疾沉綿節女衣不解帶者累月孺人

愈而節女病瘵以卒年二十有八節女資絕慧

自工文詞不由師授顧往往脫稿後卽棄去搜

殘缺僅得苗斑奴

傳一詩餘如干首

何志齋哭女弟琢齋詩北堂寒夜夢青鸞共訝

瑤池下女官忽憶西皇歸思急電光石火片時

看舍飴猶憶授詩篇百首三唐字字全吾祖痛

遺循吏傳清風佳句爾能傳論才閨閣古今奇

五色迴文蘇蕙詩爾亦停針嘗擲管泉臺未許
 竇酒知獻花夜夜禮金光此日黃昏意渺茫自
 古空傳少君術海天無復返魂香病來消渴喜
 龍芽却暑猶欣五色瓜桑苧漫言鴻漸事青門
 休問邵平家青松黃菊共秋蘭手植空憐夜色
 寒更有參差牕外竹從今誰與報平安柔惠雙
 鬟旦夕隨牽絲薤露兩同悲今朝彼此無消息
 空有傷心憶悼詞自憐孤弱淚同傾朝露偏傷
 手足情此日有兄能哭
 妹百年無妹痛無兄
 高不騫題幘篋存稿詩自是神仙有數才吹簫
 不上鳳凰臺但承阿母慈顏罷一寸心隨爨炬
 灰莫問蓬山路幾千劉郎無分詎無緣篋中冰
 雪文堪敬碧海青天譜十年鏤羽雕毛作夢端
 吐音如此洵貞鸞若操輕濁
 為詞律無地能容李易安

聞蛩聲作

井梧已老葉繽紛砌下鳴蛩如訴人切切似愁時序促

淒淒應恨露華頻秋深蕭瑟添悲氣歲往支離餘病身
 畢竟有生俱幻化臨風為爾一沾巾

集草堂句

落紅鋪徑水平池寂寞鞦韆兩繡旗燕子還來尋舊壘
 黃昏微雨畫簾時

柳梢殘日弄微晴葉底黃鸝一兩聲睡起愁懷何處著
 手按裙帶遶花行

風蒲獵獵小池塘蓮子深深隱翠房睡起綠陰初轉午
 碧綃對捲簾紋光

謝了荼蘼春事休煖風吹動繡簾鉤沉吟不語晴窗畔

掛芳集 卷十二
雨點青山滿鏡愁
手捲真珠上玉鈎
水聲山色鎖妝樓
流鶯窗外啼聲巧
一曲闌干一倍愁

石氏

湖廣湘潭縣人字曾姓未結褵而曾姓天卽守
貞不再字

書伯姊張孺人七歌後

歲攝提格月在相伯姊始生悅懸帳卽今七十聰且明
不用仙人九節杖憶昔伶仃恃母慈晨鍼午剪宵麻絲
繡窗閒展中壘傳列女法戒姊示之曲江公子乘龍壻

日歸宜室如兄弟誰分碧翁西北虧提孩入戶淚潛制
我生不辰姊不如桃華方灼鸞已孤此生未見良人面
此心欲完寡女軀簧語華言耳不入天平不諒死何懾
維時阿姊獨相憐能申大義消喋喋姊亦含辛年復年
桂蕊桐孫紛眼前焜煌翟茀慶將母房齋御板同神仙
念我惇惇痛無告親裁尺素慰清操餐膳許分祿養餘
輕帆約赴禾州道阿姊高誼世所稀藻蘋無主難奮飛
捧書反覆涕霑臆吳山湘水神遙馳弄珠樓畔壽筵啟
雲璈聲沸陳百醴傳到新詩歌七篇就中鄭重采葑菲
嗟哉身遠心轉親末由晉爵賡長春可憐毫楮殷勤意

長觸空閨薄命人烏頭何事虛名炫羸負有雛差自遣
姊如啖蔗老愈甜我似凝陰宵不旦祝嘏知不藉卮詞
綿綿情話抒我思他年白髮歸相對更爲索句歌期頤

徐文琳

江蘇吳縣人許字浙江海寧縣副榜陳子長未
嫁而寡惜所著散失

陳氏家譜徐文琳相國陳之遴夫人燦之族女也幼許字相國季子明經堪永堪永從父母于謫所未娶卒文琳賁志于母家或勸以他適文琳曰富貴而許之患難而背之我不爲也越四年燦得請歸文琳曰吾今有家矣遂歸于陳姪世奕嗣

過蓮池菴訪圓明女師

精廬屈曲倚雲根松竹周遮不二門頓使塵緣都洗滌
嬾將世網一評論山花徑遶名難辨齋罄聲沉日又昏
小衲壇前閑指點賜旛曾沐大君恩

汪芹

浙江仁和縣人天台縣廣文汪臺之長女也十
二歲卽能背誦唐詩千餘首十三歲因哭母過
愴天卒

句

微風動竹林

鴉噪夕陽月已上

字弗芸江蘇上海縣人廣文趙旭生之女字徐秉哲未于歸而卒著有幽蘭室詩草

侍御曹一士第芸詩序畧弗芸余表弟趙充寓長女也邑中傳有五歲攻書史九歲善吟咏者卽弗芸余初未觀弗芸詩余女采蘩采苻與唱酬成莫逆適庭梅爛漫姊妹相邀索題灑灑立就語不繁而意頗清曠閑雅乃請錄其平日所為詩莫不可誦邇年來余匏繫一官不讀弗芸作去秋充寓便郵至并寄弗芸卷屬刪始稔弗芸已下世甚悲之既而覆其詩覺靜氣凝然如其人又如對芝蘭香遠益清嗚呼弗芸真才女哉以爾許才不獲與尊宿爭名而挺生乎閨閣許東海佳耦將婚而蕙折蘭摧是愈可悲而其詩愈不忍沒矣雖然詩傳人與俱傳况其生也純孝焉知不更作寧馨以慰厥親哉充寓且綿祖澤于後昆矣遂書言以復充寓

秋夜

浮涼入小窗連夜問風雨落葉對幽人相看俱不語

和采苻曹表姊半涇雜題

選一

隨意栽松竹牽衣共笑歌烟霞秋自在山水興如何花外鶯聲滑簷端燕語訛聯翩新句好閨彥本東阿

聞雁

寒夜淒涼滴漏清深閨寂寂雁來鳴翩翩平野乘風急
嘹唳長空帶月明睡鴨香回金屋夢隴山雲暗玉關情
更深久坐燈花落數盡衡陽無限聲

秋夕雜題

西風初冷碧窗紗又見芙蓉一度花漠漠疎林含宿雨
蕭蕭古樹集寒鴉鴻聲遙與鐘聲亂月影還同竹影斜
夜靜徘徊闌畔立艷歌雲外是誰家

臘梅二首

寒香獨爾動詩神帶月分明瘦態真欲使平章添霽雪
異根何讓嶺頭春

高情迥絕水雲邊松栢同貞占臘天密辦丹心兩奇絕
耻從春色散芳妍

聞璞

字楚璜浙江石門縣人原任雲南庫大使譽彥

之女奉養父母矢志不嫁著有醉鶴樓詩

沈大成題石門孝女醉鶴樓詩萬里滇南侍二
親棣華彫謝更酸辛卅年不字深閨裏此是梅
花香界人綠鬢完貞到白頭寒機宿火幾
春秋遺詩字字含霜雪何似蘼蕪寫遠愁

雨晴

雨過蒼苔潤風迴院落涼露濃秋草瘦日薄海棠香愁
豈長貧集詩緣久病荒遣懷時小立屋角又斜陽

別思

景物增幽思離懷觸目中黃梅深夜雨綠蔭小池封檻
外憐芳草階前數落紅何時仍一笑攜手向花叢

落花

擷芳集 卷十二
露泣芳叢濕翠烟 淒扉風雨葬嬋娟
細飄芳艷晴波裏 亂點輕紅小院前
爭繞綺筵驚舞袖 潛侵妝閣冷金鈿
不知幾許春光減 月曉風清怨杜鵑

擷芳集卷之十二終

擷芳集卷之十三目錄

貞女詩

古歙詔菴汪啟淑選

商可 八首

李德秀 句

黃嫻 三首

許雪棠 一首

盧端 四首

莊九畹 句

葉氏 一首

唐惠淑 一首

李氏 一首

施澧蘭 三首

李氏 三首

羅學誠 句

汪桂芳 二首

徐氏 二首

唐冰操 四首

陳氏 六首

袁淑秀 一首

徐七寶 六首

沈氏 二首

田玉娥 一首

龍氏 一首

劉應月 一首

王曇影 三首

顧鎔 一首

擷芳集卷之十三

古歙叻菴汪啟淑選

商可

字長白浙江會稽縣人知府商盤之長女也字同縣王生未結褵而卒著有曇花一現集

商盤曇花一現集序居士有二女長曰可蓋取衛公女有五可之義故以名之次曰芸是歲予方以庶常散館校書蓋取芸閣之義故以名之兩女繞膝珍若雙環未幾而阿芸殤妻慟予慰之以有可在也可幼曉毛詩文義漸獵羣書居士課之有四始皆成誦時還讀我詩之語其後取急歸里江海淹留女乃自求諸古單詞隻句斐然可觀然深自啟晦秘不示人也猶憶勝國全盛時培養士林旁敷香閣吾家豕宰公子告居鄉一時門第園林之盛比諸鳴珂碎錦綠塗

揚芳集 卷十三
雕橋不特兩孝八慈爭奇競爽而淑媛多才如
嗣音景蘭雲衣諸祖姑皆緯霧經雲方駕班蔡
珠囊瑤軸傳播人間商氏閨秀故老皆能道之
而今不可復覩矣嗟乎使女得天假之年所就
當不止此而香埋玉瘞荏苒三秋居士既為女
痛復歎先澤清芬之繼續益若斯之難也先是
居士就職京師時值上巳攜女出游豐宜門外
綵索畫旗花鑣柳策日暮始歸女於是夕得病
病匝月且死死後啟舊篋中唯存端溪紫雲硯
一方畫藁一束與詩數卷而已女舉止端麗有
林下風詩亦俊逸敷腴無怨綺傷羅刻翠剪紅
之態居士不忍其散亡梓以問世此女具有宿
慧前因跣趺而逝正如優鉢曇花時一現耳女
幼字同里王生齒皆十六當旅櫬之歸也生恍
惚見之尋病終鄉人擬諸吳苑之成烟秦臺之
跨鳳然此事頗異不具論論其可述者乾隆辛
酉孟秋寶意居士
書於南康郡齋

自課

齟齬初授經傳家唯四始和平兼溫厚頗識風人旨貌
遺留乃神理合變其體方員無定形勿學塗印璽作為
冰雪詞獨賞無人喜何用黃金鏡與世刮眸子

題高且園指畫虢國夫人夜游圖追次坡翁韻

阿瞞西幸乘青驄漁陽鼙鼓來猪龍當時釀禍由妃子
五家甲第連離宮八姨婉嬙如春柳紫絲雙鞵纖纖手
璧月多情照麗人鈿釵已化長安塵畫師解得娥眉意
不帶南都粉黛痕薰天貴戚原非古西市門深芳草路
寶炬香車莫近前丞相耽耽氣如虎

垂簾

柔綠陰無際垂簾晝似年鶯聲催午課花氣擁春眠向
母尋眉譜隨兄治硯田潛心看內則鈔得兩三篇

憶鏡湖和大人韻

鰕籠蟹斲柳陰邊雙槳凌波跳白船著色畫圖忘不得
紅霞一抹晚晴天

鬪蟋蟀

誰教嘍喏兩爭雄白帝餘威到草蟲可惜旌旗兼壁壘
指揮都是小兒童

秋柳

多情大垂手婀娜早春時忽漫傷憔悴還能管別離晝

輪勞悵望衰草共愁思滿目金城色攀條始得知

題畫

雲鬢斜分玉指尖妝成小立影廉纖痴情細囑紅襟燕
啣取春愁出繡簾

霧縠冰紈稱體裁春蘭秋菊一時開芝田館外盈盈水
蕩盡人間八斗才

李德秀

江西贛縣人

句

寄語雙親休眷戀入江猶是女兒身

皇華記聞 蕪縣李氏名德秀幼讀書能詩年十五
爲寇掠置舟中女乘間告舟人索筆硯寄書父母
書尾有絕句云
云遂赴水死

黃 娒

字宏因安徽休寧縣人中翰黃松之女弟侍母
不字著有雪牕集

冬夜作

向晚掩牕扉金梭澀錦機風尖燈影怯雲重月光微撥
燼愁添炭增寒怨典衣清宵更漏永兀坐思依依

漁者

綠水青山春復秋浮家漂泊却無憂花開古渡千盃酒

風滿寒灘五月裘豈有渾流堪濯足祇應荆布慣蓬頭

聖朝況是寬漁稅儘許偷閒狎鷺鷗

人日立春

文王喻復此逢春綵勝家家鬪樣新最有梅花宜愛日
牕前飛片屬誰人

許雪棠

直隸天津縣人

雪中海棠

移從香國種無雙幾見凌寒意不降日映輕紅嬌帶淚
風扶弱質笑迎牕朱門舊許宜春睡冷院新看伴玉缸

却恨杜公無好句空教十月渡寒江

蓮坡詩話余有別業在曲周庭前海棠忽於十月間雪中盛開大尹張若巖桐城耆宿也賦七律一首甚佳和者雖多津門閨秀許雪棠為最許過時不嫁工詩文閱不示人傳播人間者惟此詩而已其詩云云汪西灝津門雜事詩有云不櫛書生不畫眉傳來艷絕海棠詩若教玉秤稱才子壓倒樓頭舊畹兒正指雪棠也

盧端

浙江仁和縣人盧國雍修仁之女也年十八卒

武穆王次稽閣部韻

爍爍旌旗野戰酣黃龍直抵志纔甘力撐半壁常輕敵
節盡全家不慕簪北塞可憐君繫二東牕堪恨獄成三

和金誤國雖由檜高廟何嘗不負慙

秧針

嫩綠如莎僅寸長天工巧琢水雲鄉無鉞不礙閒鷗立
繡陌偏令主伯忙貧女何能引金線楚臣難藉製荷裳
待看玉露秋風起滿地雲屯慶歲穰

秋夜

蛾眉新月上林邱月上林邱故故愁萬里秋風歸雁急
一聲啼破海天秋

題畫

郭外青山舊結廬微茫野徑望中無平生最愛烟霞趣

落木蕭蕭展畫圖

莊九畹

字蘭齋福建晉安縣人許字廣文吳景翊子未
嫁守貞著有秋谷集

福建通志莊九畹字蘭齋周氏女也靜慧能詩
許字詔安教諭吳應運長子晫未婚而殤九畹
時年十四守貞自矢與母氏煢煢相依二十餘
年更為姑及夫營葬春秋展墓祭必豐潔副使
單德謨書太璞完珍額以旌之著有
秋谷集侯官林正青永福黃任為序

句

早書淡墨魁時彥老把金丹度後人

香草齋詩話乾隆壬午予年八十復膺重宴鹿鳴
盛典諸戚友及四方郵寄各贈言金薤琳瑯盈

箱積帙予愧不敢當而閩秀諸什亦有可傳
者如早書云云吳景翊子婦莊九畹句也

葉氏

安徽黟縣人幼失怙母教以字好讀書學為詩
寡言笑字同邑盧生頤生弱冠得羸疾卒女聞
訃堅請于母而往登堂拜姑畢即至盧生墓再
拜成禮哀戚感人回即登樓奉盧生木主三年
不下樓服闋迎母相見絕粒七日卒康熙五十
七年 旌表建坊

謝母詩

女身雖甚柔秉性剛似鐵讀書雖不多見理亦明決女

子未字人此身潔如雪女子既字人名分不可褻幸長
 抱衾裯夫婦知有別不幸中道捐永矢守清節更慘未
 見夫夫命悲月缺女稱未亡人此時宜同穴不為慷慨
 死三年俟服闋服闋方絕粒情激禮難滅舍生違母心
 我心亦悲切從夫赴黃泉綱維庶不裂

樹密齋詩話江太蒼先生名碧李石臺先生高弟也其傳畧云女聞訃請於母欲往盧門服喪守節母曰女何不祥此於禮無之亦義所不出也女曰女何知禮然禮依乎分者也分從乎名者也母既以女字之矣此為何名名正而義立義立而分定母所謂不祥者大祥也母曰即如汝言其於事甚難女曰難在志不難在事視事所當為當為為之何難之有武進秦龍光先生來遊新安館於豐溪見傳與詩批云奇節大文詩如經文如史岫雲山人曰成培嘗讀歸震川先生貞女論謂未婚守節

為非禮心竊疑之今觀貞女名分數言乃釋然而知震川立論之為過也詩曰鬢彼兩髦實維我儀又曰母也天只不諒人只細味詩中之意蓋共姜亦未婚而守節者也而聖人亟與之安得謂為非禮乎又江研蒼先生嘗與成培言貞女歿之日有靈鵲數百飛噪於室中牕櫺皆滿驅之不去異香滿室觀者皆驚異歎息云

唐惠淑

字冰心江蘇金山縣人唐醇女許字金峩綬未
 嫁而金卒冰心守貞能文章工書畫卒年三十

一歲

咏梅三十韻

覽遍羣英致梅花信獨孚圃餘分幾種籬畔植千株地

遠心仍傲林踈貌若殊乍開堆碎玉初綻結明珠比節
松差近評香雪亦輸苔封橫鏡幹竹伴逞冰膚冷艷三
春獨塵粘半點無名隨妃子拜癖與首陽俱着雨姿凝
白烘霞蒂染朱晴光添皓素陰影入模糊臘後風光占
宵深月正須烟消妝淡淡雲護骨臞臞傍水原從僻航
山豈日迂蝶驚垂粉翅蜂避歛香鬢若爾清何極如君
俗不污何郎慚白面阮藉動青臚枝挺斜還直根蟠曲
更紆嚴冬芳獨冷新夏葉紛敷已奪梨花潔堪羞桃萼
腴瘦容擬沈約逸品重林逋庾嶺時多變羅浮竟足娛
灞橋驢背穩東閣兔毫濡紙帳黃昏靜紗牕碧影孤笛
中聲細出額際瓣輕鋪幽絕凌霄漢翛然賽畫圖書傳
驛使便夢覺美人誣調鼎鹽微拌裁縑墨淡摹嚼來寒
沁腑充去味盈壺雅譽稱高士新題賴石湖江南推第
一相拜是誰乎

李氏

貴州貴定縣人張其劇聘室其劇未婚早卒李
聞衰服奔喪守節

貴州通志張其劇聘妻李氏貴州貴定縣人幼
讀書許字其劇未歸而其劇歿女聞訃悲慟欲
絕隨衰服詣夫靈所手爲文以祭焉未幾其母
迎歸欲令改適女聞之剪髮嚙指自經者再母
知其志不可奪議終寢守節十年
卒預爲塋於夫塚之右遂合窆焉

哭夫

玉折蘭摧已愴神
臨分訣別恨無因
空瞻遺像揮紅淚
可得魂來夢裏親

施澧蘭

浙江錢塘縣人
施枚之女兄也
辯梨棗歲卽耽
唐詩且能尋繹箋
註年二十一未字而歿

春宵苦雨

瀟瀟細雨滴寒更
紙帳梅花燭半明
枕上夢迴愁思集
林間風捲怒濤行
天涯一夜生芳草
春水來朝長綠萍
更有管絃清似語
聽殘倍覺感懷生

曉望

閒望春城倚小樓
紅輪西去暮霞收
雲依蒼隼青霄遠
風送孤帆綠水流
隱隱村橋林外隔
霏霏烟靄望中浮
天涯迢遞堪娛目
好撇愁懷且自由

秋夕

雁度寒雲霜葉紅
一池秋月冷梧桐
天階碧落渾如畫
玉露還侵丹桂叢

李氏

江蘇吳縣木瀆鎮人
字常熟縣學生員沈懋敬
尋寡毀容截髮矢志
栢舟孝養舅姑課子
峻氣

吳庠爲時名彥康熙丁卯以節孝旌門崇祀
著有備嘗草

寒月

月色寒猶在吁嗟滿地霜舉頭天更遠照室夜偏長木
落澄踈影鴻飛借末光中秋人競賞歲晚重淒涼

遣悲懷

結褵早歲成偕隱從此梁鴻願不乖豈厭清貧思鼎食
爲謀甘旨典金釵病侵媵理愁先劇草沒墳塋骨已埋
三十四年悲聚散那堪垂淚掩空齋

題畫水仙

冰清玉冷度芳年一點貞心豈受憐春去藥闌留不慣
幽香紙上倩人傳

覺羅學誠

字丹奉滿州人大中丞雅爾哈善第八妹也生
而慧悟啼笑不苟矢志不字孝養父母博學好
古然不以才華自見深自韜晦故流傳甚少著
有素言一卷

雅爾哈善墓志銘余妹學誠字丹奉爲先宗伯
公季女生而慧悟啼笑不苟襁褓時乳媪失手
墮地傷腰背及長漸成疾百療不能瘳將卜字
乃跪而請曰女不幸損肢體易啟人憎訕曷若
常依膝下終其天年乎屢婉諭之志彌堅居恒
勤于針黹暇則愛讀書談古今節孝事而溫清

定省之禮不少解宗伯公卽世哀毀骨立親黨
 嗟異之乾隆辛未余承乏兩浙迎養太夫人妹
 隨侍借來益屏鉛華去修飾無怨無尤甘處于
 廢人間者莫不起敬焉次冬患微疴寢于牀忽
 遺言火葬携柩先塋遂歛衾而逝慈幃以下皆
 慟哭失聲嗚呼予奚能已于悲耶妹生于雍正
 三年六月廿三日卒于乾隆十七年十二月十
 一日今將歸葬于京西畏吾村爰揮淚濡墨而
 爲之銘曰生也何來死也何知暫游塵世幻化
 如遺天彝克盡興言足悲用藏兆側永懌孝思

盆有芝蘭牕有月悠然相對可忘言

素言予不喜爲詩諸姐強之乃作一二章猶記一
 夕次韻有句云云仍可以不必爲勸也

汪桂芳

安徽歙縣人嘉興別駕曉山族伯女孫候補州

同知震川三兄之女也許字方運判子芬未幾
 芬卒桂芳聞信竟絕粒死桂芳能詩知禮然不
 以示人故見者甚少

宮傳錢陳羣徵詩啟從來潛德竊恐淪亡自古
 閨貞皆明大義然栢舟自矢之死靡他恩已浹
 于瑟琴情方堅于金石或畫荻可賡和丸可教
 此固冰霜共潔松栢難摧者未有盟甫訂乎鸞
 儔音忽傷乎鳳翽于歸未卜痛想像夫容言合
 香何曾空愴魂于衾影識全歸之在抱愛護如
 珍哀孤鵠以潛踪心堅似鐵如貞孝三姑汪桂
 芳之甚者也桂芳爲我郡曉翁汪老公祖之孫
 女省齋世講父臺之愛君幽靜夙嫺性早篤乎
 純孝柔嘉維則儀自合乎禮宗幼秉詩書獨窺
 女史長知經學確嗜大家髮始垂髻視溫清於
 冬夏衣纔勝剪潔修澹于晨昏淡泊爲懷鄙鉛
 華而不御瑾瑜知重敦淑慎以無言抑且井臼
 親操摒擋助母蘋蘩並採誠敬尸齋愛儉而無

傷于廉禮拜而不佞于佛閨中曾子譽早著于
 平時閣下班姬學竟傳于此日緣生望族應託
 高閣合兩姓以問名締絲羅而通好迺父馳驅
 王事謂兒女已結夫姻親翁匍匐母喪云梅標
 徐待于期吉詎意所天染疾遺一紙于彌留夫
 子云亡願雙魂于窀穸聞訃而背人飲泣枯血
 無聲秉義而欲赴憑棺堅貞永矢雖曰未亡之
 不幸實抑風微之可嘉矣乃事有不諧情生更
 愴一言遙復恨所遇之坎壈兩難酬悽此身
 以何託于是歛衾長臥暗傷而猿裂寸腸絕食
 經旬香繞而鶴歸三鳥題詞絕命字字斷魂書
 跡傳心行行進淚嗚呼恨填精衛縱海枯石爛
 而難窮怨訴蒼旻即地老天荒以莫盡不有旌
 請曷克褒嘉惟欲闡彰全憑珠玉所望大儒宗
 匠錫以鴻章碩德名賢賜垂哀誄庶泉下弱
 息得妥芳魂盛世真操永留芳跡謹啟

性比
貞臣

絕命詞二首

深閨驚說未亡人空負韶華十九春一自斷腸魂不在
 劬勞恨未報雙親

脉脉無言一縷情難將血淚泣哀聲可憐薄命成孤鵠
 待向泉臺結再生

徐氏

浙江秀水縣人許字沈氏未婚聞夫訃音馳哭
 靈右守節五十年

陳梓徐孝貞傳女秀水人先世由蘭谿遷幽湖
 父晨山公自幼訓以詩禮敏慧婉嫕長能詩許

字沈氏父疾篤女撤環瑱奉湯藥既沒哀毀不欲生閱半載夫病夭女聞訃欲就翁家執喪家人百計阻之女潸然曰我知有父命耳女子許嫁纓示有所屬也若懷二心他日何以見父地下遂服嫁衣歸沈氏翁姑重其節拜禮之既易衰不哭終日不食大歛後乃徐進糜飲夫叔母鄭氏故守志喜曰此吾同心人也遂聯榻寢處誓終身焉時年十九女初歸取舊所作詩草悉焚棄或傳其立夏日哭父句云不知地下逢今日也有青梅佐酒無此外無存者論曰夫婦之義等于君臣許字而未嫁未成乎婦也矢志守貞非賢者過之乎然貞女篤孝從父所命死其夫迺不忍死其親也觀其從容就義得之庭訓者豈偶然哉與世之激烈狗名者有間矣

題夫遺照

百歲相依紙上身仰瞻幾度淚紛紛
詩狂未獲生前見書癖還從死後聞
樹外寒鴉翻落照樓頭秋雁叫孤雲

一絲早繫綱常重應許哀魂傍土墳

立夏日哭父

細雨凝烟積翠鋪山牕啼殺鳥聲孤
不知地下逢今日也有青梅佐酒無

唐冰操

江蘇武進縣人唐匡九之女明順之先生後裔也
字丹陽賀和衷未嫁守貞

丹陽縣志唐貞女毘陵貢生唐匡九女先儒唐荆川順之裔孫女也許字賀和衷年十七賀病卒訃聞日夜潛飲泣自字曰冰操微見志云居二年父母欲為配氏泣曰女此身屬賀明矣何得更他適遂歸賀婉轉事舅姑繼姪為嗣十餘年卒有遺筆四章

遺筆四首

予生且休矣薄命屬星辰落落誰憐我悠悠難告人簾
 垂長閉影院冷不知春白日憎騰過愁腸夢裏真
 鶴溪歸棹後何日是佳辰骨瘦真如竹形衰畧似人親
 憂經半載女病已三春生死原無望寧須辨假真
 記得殘冬日歸迎正誕辰傷哉不孝女已矣未亡人父
 母逡巡老翁姑自在春最憐膝下子孺慕本天真
 依依縈兩地空自負良辰辛苦曾同弟存亡莫問人蕭
 蕭風雨夜黯黯別離春小院偏多事拈毫為寫真

陳氏

號無波居士湖北漢陽縣人陳龍岩之女字儒

童宋正學未婚宋故陳卽勵志守貞著有遺詩

一卷

魏楚翹遺詩跋畧貞媛無波居士陳氏望族父
 龍岩以詩名家故不貧而貧于喜賓客暨好韻
 事蓋至貞媛矢志日其父兄生人產已揮斥殆
 盡矣宅西有羣芳別墅文酒會讌無虛日無波
 其池上亭名貞媛署之以勵志也憶往與耕原
 交垂廿餘年歲時過從其大父龍岩雖臥病猶
 起為竟日歡東川大阮意氣照人每花晨月夜
 茗酒交戰出其內庭暢咏之什蓋無減謝家柳
 絮况越十餘年祖若叔相繼逝耕原頗鬱鬱予
 亦衣食奔走歲一再晤而已耕原東走齊南歷
 豫仍以疾劇而歸歸則貞媛尋遂地下志逾年
 耕原亦死嗚呼友朋三世存亡予迭見之回溯
 當年過從文酒之盛而已不可復得矣耕原詩
 律清穩尤時為予道其貞姑之作以為樸率有

名媛風惜及之日焚不欲存故見者絕少今所刊軼詩由多方掇拾得之也然子有以知其足貴者昔人云詩文書畫皆以人重章惇京市書非不佳後人視若土宜假顏魯公不工書一點一畫亦決必傳志節之謂也貞媛許字朱生正學幼善屬文未及婚天識者憫之

歸舟卽事

風靜歸帆穩清光滿目前一湖沉淡月雙槳破輕烟奮躍魚堪羨飛鳴雁可憐五峯名勝地不得久留連

父病小愈

垂老嗟吾父年來只閉門苦心緣著作多病爲兒孫常

度東山屐慵開北海樽交遊近亦零落所忻今強起扶杖過花

村

水仙和懋姪韻

知是塵埃寄跡難不隨紅紫傍雕闌石溪偶試凌波襪金盞高擎碧玉盤應向洛濱矜冷艷如臨湘浦怨輕寒梅兄若弟從他咏只許幽牕月下看

晚眺

夕陽西下鳥飛斜淚眼模糊望不奢忘却秋深楓葉老朦朧錯認杜鵑花

掃公姑墓

荒墳但見草萋萋淚洒風前日欲西不識未亡人死後清明誰向此間啼

暮春

草滿池塘花亂飛
門前楊柳正依依
閒庭日暮簾空捲
不見孤棲燕子歸

袁淑秀

貴州安順府人全洪圖聘妻洪圖天卒袁雉經

以殉

絕命辭

君孤黃榜願妾負赤繩緣沉痛渾難已相從到九泉

貴州通志全洪圖聘妻袁氏貴州安順府人貢生袁英之女名淑秀七歲英歿母教以女紅兼工書史許字生員全洪圖未嫁而洪圖歿淑秀時年十六聞訃即掩戶書絕命辭一首自縊而死雍正十

二年知府王玠詳請題旌

徐七寶

字雅閒安徽歙縣人邑庠生徐芳沅之女也許

字曹別駕學詩家孫曹榜迎娶前一日卒平昔

詩草皆自焚毀僅餘病中所作傷心吟一冊

史震林跋冬夜檢篋得曹震亭未嫁孫媳畧節數紙不詳姓氏里居存歿年齒畧云女生于雍正乙卯年其母夢仙姬送銅雀硯龍賓墨琅玕筆珊瑚架玳瑁筒水精池玉鎮紙曰此七寶也以供雅閒用次日女生因名七寶字雅閒三歲能識字五歲識至數千並解字義九歲熟四書毛詩小學授以唐宋詩集而性尤愛宋詩年十有四母病經年衣不解帶母歿哀毀既死復蘇十有六歲秋患瘧讀朱子或問父笑之對曰求明此理耳為詩數百首死後散失句有山色有

無疎竹外詩情濃淡落花前女蘿葉密全遮屋
扁豆花多半碍門石界雙流橫作澗山圍一掌
仄成村山嘴忽明松吐月隴頭生艷相舍霜此
山居詩也簾放月來花影碎雁拖雲去水紋平
怕雨不教蕉放葉驗風常看柳搖絲此蔚然居
詩也踏青路冷清明市沽酒杯閒上已爐此春
寒詩也一尺短帘沽酒店幾堆殘燒打魚家此
舟過梅溪詩也數錢好向朱門去貧女家惟兩
卷書此諭鼠詩也又有憶母詩樓空在挂蠨蛸
網砌壞從開蝶蝶花月落孤墳烟更白雨來空
院草還青七寶性喜宋詩蘇
陸集中不多有此佳句也

傷心吟

前生疑住蕊珠宮悟徹塵緣色色空仙骨玲瓏都化月
春花寥寂更愁風無才未必甘情薄有淚應須借夢通
憔悴小梅零落後今年不識野桃紅

生來性冷愛山居晝捲湘簾薄夢餘翠袖倚歸溪上竹
雲環摘罷澗邊蔬有詩祇贈隨風絮無藥能醫病月蝨
却空小樓人去後鏡奩誰檢讀殘書

玉臺敢說舊風存朱鳥牕邊怨病煩瑤草已甘遭雪虐
露桃何必乞春溫月明白鼓湘妃瑟花影誰題崔護門
但使年年寒食墓一盂麥飯卽郎恩

碧雲縹緲弔湘娥花落黃陵廟裏多閨苑忽聞催白鳳
瑤臺無復畫清螺佳期終願歸幽室後約還須問大羅
縱有迴文泉路錦含淒何處寄連波

挑盡殘燈暗復明隔牕初斷遠村更玉樓若使能憐我

金屋依然可喚卿但祝鸞膠期再世何須癩髓怨三生
吟箋檢點焚將盡不向梅花淡借名

寂寥人醉未調琴誰爲求凰譜好音妝閣已拖青鏡影
夜臺應抱白頭吟薄緣似月還同缺舊夢如雲不可尋
迴望夕陽松裏屋空留蒼翠萬峰陰

沈氏

名倩霞浙江嘉興縣人字同邑國學生陳倫敘
未婚而卒氏矢志栢舟事翁姑皆極孝

歸陳

間關未咏歎鸞孤矢志靡他寧改圖只是低頭辭父母
可憐縞素見翁姑香升雲右魂何在淚滴樽前眼欲枯
知有堂前親未老免將溫清答親夫

臨終

二十餘年苦守貞婦兼子職獻真誠而今瞑目歸泉下
庶保生前一點名

田玉娥

許字浙江山陰縣童筠未婚而卒

送外

錢塘相送遠過此是杭州月杵春鄉夢霜砧搗客愁渡
頭千樹老江上一帆秋無限臨歧意東西水自流

蓮坡詩話童筠山陰縣人遊毛大可檢討奇齡之門工詩文幼聘姑女田玉娥未婚而童以事北上田送之詩云云後童竟不歸田以天亡

龍氏

雲南昆明縣人進士劉恬聘為繼室未婚守志

太守王文治龍貞女詩序貞女姓龍氏滇之昆明人進士劉恬聘為繼室合色牽絲將有日矣而乃公明才儁福遜庸人叔寶神清相非壽者貞女將投身於瀨水抗跡於汨羅上天鑒佑已絕復甦鄰里代為之悲父母莫移其志先是劉君元配藐有遺孤賴巾幗之程嬰為家門之周勃茹荼畫荻八歷寒暄卒以憂能損人才不偶數年未三十嘔血而終蓋卷菴之草心本易傷其命之禽理無獨活矣貞女幼通經史善屬文內言不出世罕聞知孤子平矜頗能口誦摹曹娥之碑版每動悲哀聽女頽之砧聲無非激楚嗚呼崩城哭市或無飛絮之才習禮明詩或乏貞松之節以文兼行自古為難攷厥遺徽有裨風化也
夢樓王文治太守過龍貞女故居詩重門苔跡厚一徑閉蒼蒼里合名全節詩曾譜斷腸玉因舍璞貴蘭以被煎芳寄語貞松質無須怨雪霜

暮春

却憑何物餞春歸
淚灑風前送夕暉
鶯舌喚將芳草暮
蜂鬚撩引落花飛
池塘夢淺隨風繞
庭院愁加帶雨霏
已覺困人腸欲斷
不堪還對柳依依

劉應月

字銀蟾江蘇上海縣人劉夢金女許字曹錫輿
未婚而嫠

素蘭

便點微紅亦自芳鉛華不洗祇尋常誰知薄命紅顏者
血淚垂垂濺素裳

王曇影

字文娟浙江蘭溪縣人隨父寄居廣陵工畫蘭
善弈精曉梵典許字劉生青夕爲侍者將次于

歸倏爾謝世

閒居卽事

雨後碧苔長春歸綠蔭濃楞嚴閒讀罷殘日下窗櫺
有感

梅雨正連綿悲雲濕遠天桐花開復落別語竟茫然
楊柳嫋風清飛飛燕語輕綠愁雙黛感花落雨無聲
簷前滴瀝雨牕前明滅燈幽懷獨耿耿良夜竟何憑

夏夜

雨向堦前滴愁從靜夜多聊傾殘茗飲無可奈愁何

顧鎔

江蘇山陽縣人也

梅花

曲徑小橋東輕盈綴露叢濃妝烘曉日醉臉笑春風三
月清明節一枝爛漫紅武陵溪水上曾否賺漁翁

擷芳集卷之十三終

擷芳集卷之十四目錄

才媛詩

古歙訶菴汪啟淑選

夏惠姑 三首

姚氏 四首

崔秀玉 句

畢著 四首

黃媛貞 七首

黃媛介 八首

鄧氏 句

沈關關 一首

陳何 二首

葉子眉 一首

彭氏 五首

歸淑芬 七首

沈嬪 二首

沈璫 二首

沈璿 二首

梁孟昭 四首

瞿雯 一首

岳湘娥 二首

姚淑 六首

黃曇生 四首

王氏 句

擷芳集卷之十四

古歛訥菴汪啟淑選

夏惠姑

字昭南江蘇華亭縣人明吏部考功司主事夏允彝之次女

中秋見月憶姊妹還家之約

千門夜色暎晴河萬里潮聲起白波
玉露新凋梧影薄清風遙送桂香多
故園空有三秋約野迳難逢一雁過
兩地相思同此恨好憑朗月寄離歌

蘇堤春曉

暖風晴日冶遊天柳外長堤引馬前掩映珠鞭花外見
參差錦帶樹中還天桃夾岸生紅浪碧草連雲起紫煙
忽憶髯翁吟笑日水光山色盡詩箋

二月雨雪同靜維樓止曹溪并美南姊作

雲凝風急雁飛鳴雨雪相從自有情一帶遠山寒玉映
數重深樹夜珠明論心此日歡方洽惜別他時感又生
便欲隨君愁未得梅花香夢隔蓬瀛

姚氏

浙江上虞縣人明餘姚黃尊素忠端公配也生
於萬歷間卒本朝康熙庚申年八十七

咏蒲扇

挺出淤泥不染塵虛寒徹骨世無隣何人採織還成扇
留取遺風被後人

世間物性看無定百鍊偏成繞指柔何似芰蒲經織後
能將九夏變三秋

輕紈綵筆製繽紛畫閣蘭堂爭媚人却愛蒲葵存素質
不隨時樣伴貧身

矮簷溽暑來無避輕翼蠅蚊作意驕賴汝威風長在手
驅除令我免煩囂

崔秀玉

江蘇江寧縣人著有耽佳閣詩集未見

句

恰喜花名似鳥名

陳維崧婦人集秣陵崔秀玉父吳門老教授家貧
僦居鷄鳴塢下常口授秀玉書史無不明曉著有
耽佳閣詩集一卷如咏
杜鵑花句云云絕可想

畢著

字韜文安徽歙縣人適崑山王聖開著有集惜

散失

國朝詩別裁集畢韜文歙縣人隨父宦游薊邱
父與流賊戰死屍為賊擄眾議請兵復仇韜文
以謂請兵則曠日賊且知備即於是夜率精銳
劫賊營賊正飲酒兵至駭甚韜文手刃其渠眾

遂潰追之多自相踐蹈死乃輿父屍而歸葬于
金陵時韜文年只二十後適崑山王聖開裙布
釵荆無復往時義勇
氣矣白首相莊以沒
又韜文詩稿向見於家來遠兄處序中有云梨
花槍萬人無敵鐵胎弓五石能關又云入軍營
而殺賊虎穴深探奪父尸以還山龍潭安葬又
云室中椎髻何殊孺仲之妻隴上攜鉏可並龐
公之偶時異其人鈔錄五言古七言絕二章來
遠兄沒畢詩徧索不可得矣存此舊錄聊以見
其生平

紀事

吾父矢報國戰死於薊邱父馬為賊乘父屍為賊收父
讐不能報有愧秦女休乘賊不及防夜進千貔貅殺賊
血漉漉手握仇人頭賊眾自相殺屍橫滿院溝父體與

掛芳集 卷十四
三
櫬歸薄葬荒山陬相期智勇士慨焉賊同仇俄賊一掃
淨國家固金甌

採花蜂

遍採名園萬樹芳春風鼓鑄滿篝糧徒勞巧醞三冬計
詎料難留百疊房甘苦不須重借問艱辛回憶倍堪傷
若還解得爲誰語隨分安身是道場

織繭蠶

柔腸輾盡纔成繭吐織迴環費揣摩只道括囊堪瑾戶
誰知胠篋竟投鍋齊紈蜀錦從人異女服男衣賴汝多
莫看熱湯繅後蛹出頭有幾是生蛾

村居

席門閉傍水之涯夫壻安貧不作家來日斷炊何暇問
且攜鴉觜種梅花

黃媛貞

字皆德浙江秀水縣人知府朱茂時繼室著有
雲卧齋詩集

秋牕閱史

幽懷閱古今嘆息因何設君心昧虛靈孤臣恨難徹負
却精誠言向彼炎曲舌咸若堯舜仁如何有興滅林下
秋來風夙夜吹不竭

春日行

蝶粉蜂黃春習習無言立在欄干側情懷不勝風日香
離別那堪楊柳色花飛花飛若何美人紅淚沾香羅
天路蒼茫不可涉水凜凜兮山峩峩

春閨詠

雲飛月落天將明新鶯嬌囀前窗聲琴書相向兩無賴
無端獨自愁盈盈娥娥紅粉簾櫳裏閉花滿瓶插香水
流蘇輕揭曉光寒強自添衣情已矣春風吹人人更愁
紅日未滿欄干頭如何如何夢不在鷓鴣啼上花間樓

秋夜歌

寒蕭蕭兮清夜中欄干十二畱西風西風愁人愁如此
冷蛩聲徹羅幃空閑心更惜秋光老總是深深結懷抱
翠被香餘繡枕單復起燈前翻舊稿

初秋

草木踈踈綠未乾飄風日夕動林端拈將針線寧心就
理得音徽不暇彈曉起簾櫳初退暑晚來樓閣又生寒
衣輕扇冷無餘事好向窗前借月看

立秋日夢分得成字

窻前修竹洗來清且理琴書託此生涼到半庭分夏去
夢將一字許秋成凌虛久接梧桐影孤坐新鶯砧杵聲

我意正悲時節易更教重論月中情

晚望

秋空木葉寒日落湖雲冷微雨滴梧桐安知別離恨

黃媛介

字皆令浙江秀水縣人媛貞女弟也適同郡楊

元動著有湖上草離隱詩如石閣漫草

秀水縣志黃媛介字皆令文學黃鼎妹能詩書

法鍾王時以衛夫人目之圖繪寶鑑黃媛介字皆令楊世功之配善古詩

詞著作甚富楷書摹黃庭經十三行畫山水小

景有元人筆致長齋事佛有賢行京室

閨彥多師事之客都良久老反吳下

婦人集嘉興黃皆令詩名噪甚恒以輕航載筆

格詣吳越間余常見其僦居西冷斷橋頭凭一

小閣賣詩畫自活

徐鉉本事詩嘉興女士黃德貞月輝有送皆令

北游調踏歌詞一闕飛絮縈香閣橫波繞畫簾

都將煩惱意付與別離船

白雪長安聲價重盼遙天

無聲詩史黃媛介字皆令嘉禾黃葵陽先生族

女也髻齡卽嫺翰墨好吟咏工書畫楷書仿黃

庭經畫似吳仲圭而簡遠過之其詩初從選體

國朝畫徵錄黃媛介字皆令秀水人人工詩賦善山水得吳仲圭法太倉張西銘溥聞其名往求之時皆令已許楊氏楊久客不歸父兄勸之改字誓不可卒歸於楊乙酉城破家失乃轉徙吳越間甕食於詩畫焉嘗為新城王阮亭寫山水小幅自題詩曰懶登高閣望青山愧我年來學閉關淡墨遙傳千載意孤峯只在有無間詞旨亦雋永竹垞明詩綜不錄皆令一字所錄閨秀詩悉送別皆令之作蓋不以皆令為前明人也時同里吳氏字素聞亦善山水及士女吳與倪仁吉以畫山水聞

池北偶談禾中閨秀黃媛介字皆令負詩名數十年為子畫一小幅自題云云皆令作小賦頗有魏晉風致少時太倉張西銘溥聞其名往求之皆令時已許字楊氏久客不歸父兄屢勸之改字不可聞張言即約某日會某所設屏幃觀之既罷語父兄曰吾以張公名士欲一見之今觀其人有才無命可惜也時張方入翰林有重名不逾年竟卒皆令卒歸楊氏

無名氏黃皆令新詩序畧吾樓新成河東邀皆令至止硯匣筆床清琴柔翰挹西山之翠微望東山之畫障丹鉛紛繪篇什流傳中吳閩闕修為盛事南宗伯署中間園數畝老梅盤拿柰子花如雪屋烽烟旁午訣別倉皇皆令擬河梁之作河東抒零雨之章分手前期暫游小別迄今數年往矣今年冬予游湖上皆令僑寓秦樓見其新詩骨格老蒼音節頓挫雲山一角落筆清遠皆視昔有加而其窮亦日甚湖上之人有目無覩蠅鳴之詩鴉塗之字互相題拂于皆令莫或過而問焉衣帔綻裂兒女啼號積雪拒門炊烟斷續古人賦士不遇女亦有焉噫其怨矣滄海橫流劫灰蕩埽留署古梅老柰亦猶夫上林之盧橘寢園之櫻桃斬艾為樵薪矣絳雲圖書萬軸一夕煨燼與西清東觀琅函玉軸俱往矣紅袖告行紫臺一去過清風而留題望江南而祖別少陵墮曲江之淚遺山續小娘之歌世非無才女子珠沉玉碎踐戎馬而換牛羊視皆令何如皆令雖窮清詞麗句點染殘山剩水間固未為不幸也河東河上詩最是西泠寒食路桃

花得氣美人中皆令苦相吟賞今日西湖追憶
此語豈非窮塵往劫河東患難洗心懺除月露
香燈禪版淨侶蕭然皆令盡
歸隱乎當屬賦詩以招之

施閨章黃氏皆令小傳嘉興黃氏媛介字皆令
同郡楊世功妻也先世有顯者介性淑警聞兄
鼎讀書聲欣然請學多通文史既許字世功後
有大力者艷其才將奪之介曰食貧吾命也卒
歸楊惟髻親井曰間作詩畫臨小楷書法筆意
蕭遠無兒女子態世功讀書不成遂勸之偕隱
國初隨世功避兵播遷所至有知者時相餉遺
卞處士妻吳巖子以詩名假館留數月為文字
交嘗棲山陰梅市與諸大家名妹靜女唱酬有
越游詩還家湖上好者傳其筆墨名日起世
功用是以布衣游公卿間持書畫片紙或易米
數石介既垂老傷世功無家人產以游為生甞
勉同勞苦歎曰妾聞婦人之道出必蔽面言不
出柵得稍給餽粥完穉弱婚嫁吾守數椽沒齒
矣會石吏部有女知書自京邸遺書幣強致為
女師舟抵天津一子德麟溺死明年女本善又

天介遂無子懣甚南歸過江寧值佟夫人賢而
文留養病於僻園半歲卒遺詩千餘篇嘗募人
剗刷自叙其家世中落生蓼長荼飢不食邪蒿
之菜倦不息曲木之陰天既儉我乾靈不甘頑
質藉此斑管用寫幽懷倘付諸蠹鼠與腐草流
電一瞬消沉實為悵悵詞旨酸妍讀者悲之
王士正觀黃皆令書扇詩歸來堂裏罷愁粧離
隱詩成淚數行才調祇應全衛鏢風流底許嫁
文鴛蕭蘭宮掖裁新賦香茗飄零失舊
章今日貞元搖落客不將巧語憶秋娘
李良年送黃皆令歸吳詩會因廡下棲吳市忽
憶藏書過若耶愁殺鴛鴦湖口月年年相對是
天涯盛名多恐負清閒此去蘭陵好閉
關柳絮滿園香茗圻侍兒添墨寫青山
徐緘送皆令同外渡錢塘詩沙頭挈玉瓶揮手
共飄零潮落江心狹雲歸天目青樓船龍子國
詞賦女人星底事陶
彭澤飢驅不暫停

鴛鴦湖

輕風貼水飛春燕佳人宛自簾中見
向水闌杆處處園
梅花草葉春香變昨夜雲晴日影孤
中洲曲沼生新蘆
嘉興風景知何處亂帆烟柳鴛鴦湖

同祁夫人商媚生祁修媽湘君張楚纘朱趙璧遊

寓山分韻二首

名園多異植花遶曲闌邊山抱蒼潭水林藏碧樹烟
棲烏啼月下迴棹泊霜前酒罷同歸閣開奩納翠鈿
佳園饒逸趣遠客一登臺薜老蒼烟靜風高落木哀
看山空翠濕覓路亂雲開欲和金閨句慙非兔苑才

旅中秋日

憂危只有客心微贏得湖光蔽竹扉
囊有新詩聊寄賞
家存舊壁亦懷歸青山斷處饒紅葉黃菊開時少
白衣近水陰晴容易過忽驚風雨打窗飛

南湖竹枝詞三首

胭脂點罷拂雙蛾換整衣裳厭麝多
爭向水邊呼不住
弄鈎潛自拗輕荷

倚屏點拂晚粧濃膩粉中間映淡紅
墮髻不粧間首飾
鳳釵斜插玉玲瓏

嘉興美女慣濃粧絕樣南珠間翠璫
廣袖繡完裁四帛
外頭單罩紫綃裳

題畫

懶登高閣望青山愧我年來學閉關澹墨遙傳縹渺意
孤峯只在有無間

鄧氏

安徽當塗縣人貢生鄧世耀之女也適同邑吳

懋學

句

文章精氣留遺篋不共春風逝落花

當塗縣志知州吳本涵妻寧國縣教諭楊曦女性
端婉寡言笑事堂上極盡孝養每出奩資以周隣
族其理內政從未嘗妄有嗔怒而婢僕肅然臨革
無恙累贈宜人子懋學妻鄧氏拔貢世耀女幼讀

書能文叔父世杰歿于官耀以詩輓之未竟遽出
氏卽援筆續之云云父大異之十九歸懋學力修
婦職姑早逝每忌辰必銜哀致敬捧匭進食如
事生焉一夕夢青衣老媪約之遂逝贈安人

沈關關

字宮音江蘇吳江縣人沈寶威之幼女也母楊

氏名卯君字雲和工繡佛用髮代線號爲墨繡

宮音傳其技兼絺山水人物更得畫家氣韻適

浙江烏程王君琰

廖景文養疴間記吳江顧茂倫自號雪灘釣叟
同邑女史沈關關爲繡雪灘濯足圖題者萊陽
姜如須先生尤西堂太史朱竹垞編修陳
其年檢討四十餘人今藏郡中好事家

水扉

盈盈江上落花稀何處鶯聲到水扉望裏青山春最近
看他出谷一雙飛

陳何

浙江蕭山縣人毛西河先生配也

子夜歌

一去已十載九夏隔千山雙珥依然在如何不得環

白露收荷葉清明種藕枝君行方歲暮那有見蓮時

西河詩話陳何寄子夜歌二章蓋憶予作也其序云外人以避仇未歸檢黃皆令子夜歌用其詞則是貸皆令作者其詞云云舊體蓮本隱憐今借隱蓮然亦可隱憐以子曾自呼阿憐翁故也何予婦字無

葉子眉

江蘇揚州人

宜溝店題壁

馬足飛塵到鬢邊傷心羞整舊花鈿回頭難憶宮中事

衰柳空垂起暮煙

婦人集辛卯冬宜興史孝廉名鑑宗北上道經淇水夜宿宜溝客舍見壁間有數行云云後又云妾廣陵人也從事西宮曾不二載馬上琵琶逐塵長去愴懷賦此和淚濡毫促裝心亂語不成章時庚寅七夕後四日廣陵葉子眉識呼主者問之知為宏光西宮也

彭氏

河南鄧州人廣西布政彭而述之女適李生鴻

儒著有長林蝶龕諸藁

王士正跋宋葉石林先生每晨起集諸女子婦
為說春秋近武林黃夫人顧氏若璞好講河渠
屯田邊防諸大政子讀其書未嘗不自慚須眉
也青立見示蝶龕近詩如種桑問織諸篇彷彿
幽風遺意而哭母憶妹課兒之作尤有河廣載
閣者如此殆不減石林而夫人之才亦
詎出黃夫人下耶因為論次之如右

池北偶談鄧州彭氏布政司禹峯女適李鴻儒
字青立文達公裔孫學士恒茂之子子門人也
鴻亦能詩而才不及婦予嘗序其蝶龕集刻之
京師如詠白蓮云月亦驕花色風偏送葉香刺
繡云針宜停午倦窗喜趁新晴送外云山川日
以遠雨雪天將寒皆佳句也又雷家灣云峯峯
斜倚俯清濤一葉孤舟亂後身洞口白雲鷄犬
在此中大有避秦人金銀洞云絕壁繩橋萬壑
深春風何意此登臨安禪暫借蒲團力坐聽神
龍澗底吟又謝張夫人寄芽茶云云種柳云繞

畦煙水望迷離種得桃枝間柳枝好是年年芳
草地春晴須記聽鶯時惜香橙云幾經剪拂始
成林夏晚移牀就綠陰却怪一朝風雪惡
惜香空負十年心此類數十篇皆可誦也
詩觀昔與禹峯先生痛飲龍岡倡和甚盛而今
嗣海翼直上復叨世好時以詩文往來不知其
閨閣中驚才絕調有長林君直似雄奇丈夫潑
墨淋漓而騁挾電吞霞之勝非青立以稿授我
幾於失之

課農人種桑示諸婦

種桑令欲稀晨夕風露透抽條葉以繁筠籠日相就繭
成得收絲織紝不敢後辛苦分所甘寄語諸少婦

拜姑墓

攜有諸孫在嬉聲想其聞未能承婦道徒爾拜姑墳俎

豆心先潔蘋蘩手自薰悽然松栢下灑淚滿寒雲

謝張夫人寄蘭花香

博山晴結穗雲黃一榻春風入蕙鄉蝶翅初回幽谷夢
只聞花氣不聞香

課兒輩夜讀

午過涼生暑氣回半擎燈火竹簾開窗前莫厭參丸苦
日後甘從此處來

謝張夫人寄芽茶

半爐松火汲清泉淨洗砂鐺手自煎度得銀餅香欲透
一甌先供繡幃前

歸淑芬

字素英浙江秀水縣人適同邑高陽著有雲和

閣集百花詩

秀水縣志歸淑芬字素英高文學陽室也初居
花村晚遷香溪北偕隱聯吟輯古今名媛百花
詩詞行世有雲和閣集同里王方伯庭曹侍郎
溶為之序兼工書畫然筆墨珍惜購之不可多
得也

閨秀黃德貞雲和閣詩草序略吾郡素英學有
淵源博爛風雅近惠雲和閣二集詩意度恬適
而有雋味較諸初刻更進一層其咏春花則文
抽錦綺賡朝雲則拍按香檀尋山水則慷慨磊
落賦贈荅則情韞綿密語令人心驚字令人色
飛墨衣欲舞筆悅將仙非得乎詩之正宗而去
夫詞之變體者哉

村居遣興

不覺秋將半皆因病起遲裁雲慵折芰吸露莫齊眉偕
隱同耕蕙參圓各訪師西池塵遠隔空谷月明知搗藥
醫愁緒飄香示晚期探幽非遁跡作旅暫爲羈白苧通
南浦黃花傍短籬雖無人送酒幸有雨催詩窗外飛鳴
鴈村深絕問奇彈棊纔解悶掃葉且烹葵芋栗當年盛
田園此際虧敲松驚鶴夢促織動閨思茗醉忘今古柴
關度歲時諸鄰供異卉勿費買山資

寄吊王孝女和外原韻

倉皇不暇惜衣資烈焰如同赤壁時扶櫬獨難惟自覆
傾家何必倩誰支魂依失鳥騰空杳泣向黃泉訴苦遲
他日名傳青史炳定逢旌表沐恩滋
當年蔡順舊奇兒角上名閨今更垂失火三秋驚弱息
伏棺頃刻化仙姬難留寸艸存香骨欲殉高堂殞淑姿
烏咽蛩悲雲亦慘花嗟猶帶淚痕漚

謁石筍夫人廟

力掃塵蒙奕世傳堅貞鼎立一枝連捐生就義咸閨淑
殉節同封號順天密密花鈿遺寶像亭亭石筍傍菰田
兀然遠映鴛湖秀古廟英靈無盡年

村居看菊

掛芳集 卷十四 古
養拙棲幽谷調飢採落英更承清露飲何用啟柴荆

逐魔

詩魔莫擾混禪心懶向春前賦短吟欲坐蒲團忘歲月
不知林外落花深
寂寂松關禮世尊百端往事總休論梵音如慰幽人恨
不許愁魔上葦門

沈嬪

觀緣姪女弟詩見香閣流芳集

吳元姊

若箇是知音愁多懶抱琴非關情意淺夜月亂人心

休哉賢姊氏行與古人同一日如千古真空不落空

沈璫

觀緣姪女詩見香閣流芳集

哭姑母

茗水清漣繞墓門蕭條風雨共黃昏徒憐夜夜嫦娥照
何處追尋淑女魂
人冷粧臺翠帳寒曉雲飛去覓無端傷心曾繡鴛鴦譜
指點頻教小阮看

沈增

觀緣姪女詩見香閣流芳集

哭姑母

婺星忽殞冷粧臺物換星移幾度來好似黃楊偏厄閏
驚聞競渡不勝哀

勘破今生一鏡緣郵亭無語挾飛仙分明蒼白斯須變
煮石餐霞願執鞭

梁孟昭

字夷素浙江錢塘縣人善丹青茅修撰見滄之
媳著有墨繡軒集

圖繪寶鑑梁孟昭字夷素錢塘人狀元茅瓚孫
文學九仍室畫工花鳥字精小楷女士中之表
表者其長短詩歌大小墨妙雖作手亦當讓一
頭地著山水吟等集僅錄其題畫冬景云云

題畫

登樓忽見山頭白冰筋如鏤掛瑤碧曉窻風急喚垂簾
鶴唳一聲天地窄雪花騁艷鬪梅花遜色輸香各自奢
終日費人評品事腸枯頻喚煮濃茶

春湖

每到春湖上看山憶畫家松頭時遇鶴水面或流花南
竹喧驕馬西綾競寶車白雲能自嬾片片倚峰斜

題自畫雲山

忽驚窗外遠山移却是風將雲影欹我道青山應有主
不因朝暮變容儀

湖晚

西子湖頭烟滿村山窗風雨欲黃昏塔燈漁艸參差出
為怯清寒喚掩門

瞿 雯

字雲子江蘇無錫縣人善畫

畫梅寄周寶鐙

格比瑤臺貴姿如萼綠華年年並張碩夜夜泛仙槎

圖繪寶鑑瞿雯字雲子無錫人畫梅寄周寶鐙夫
人有詩云云

岳湘娥

字竹賓浙江西安縣人適全邑庠生劉安世能

文並善填詞著有竹間集身沒前一日以為非
婦人事盡投諸火

文奎耀表娣以風塵二律見示詩思奇雋因拈管
效顰若此壓倒元白非所望也

蕭瑟庭前碧樹幽酒帘飄處杏花柔春傳鳥語吳宮曉
夜度砧聲漢院秋三徑時鳴蔣詡竹一宵穩助子安舟
天涯多少羈人耳又送鴻聲動旅愁

右咏風

野馬網纏過眼頻茫茫如爾混閒身凌波小步微生襪
障面西風怕污人巖壑清幽揮麈尾關山迢遞送車輪
杏花門巷重來燕蹴斷香泥別有春

右咏塵

姚淑

字仲淑江蘇江寧縣人自號鍾山秀才能詩善

畫適西蜀李長祥著有海棠居詩集

龔百藥鍾山秀才詩序略鍾山秀才非男子也其詩則非婦人女子也古今婦人女子之為詩者有矣其為之而傳不傳未可知也其為之而傳者有矣而觀者則曰是婦人女子之詩也豈非不知詩者過哉西蜀李研齋先生為之說曰孔子之言詩謂其可以興觀群怨而事父事君焉不徒鳥獸草木之多識也不知而為之者得其半止有鳥獸草木之名而已善乎研齋此言非研齋不能有此言也研齋既雄於文其論詩也以清謂詩末有不清而可以為詩者夫質之素者鮮味之淡者甘得乎天者也豈非詩家所甚難嗟乎乃竟為齷齪有哉余生平最好太白詩然以為非學可似偶然而得之反或有焉今讀秀才之詩又不覺爽然自失倘研齋所謂詩

之清者與姚夫人仲淑研齋之夫人江寧人故自號鍾山秀才余是以序之使天下後世之人知有鍾山秀才詩也

送太史遊臨安

送君上扁舟低首不能語歸來無幾時今又遠方去步步望不見何時其一處不惜閨閣寒但恐風烟阻

裴公亭

昔聞裴公有亭在今到裴公亭已壞只見山青青入天不盡長江空一派古來城闕總成邱况此孤亭幾度秋高賢去後名偏久年年荒徑有人遊

海棠居獨坐

但得春風卽有香晴窗坐久覺衣涼樓前古木高連日
山後新花艷過墻還向河圖觀理數早從太極悟陰陽
幽居自負書生性却恨雲鬟是女粧

自君之出矣

自君之出矣悵悵入羅幃思君如畫鳥有翼不能飛
自君之出矣日日望還家思君如短笛夢裏落梅花

中秋

浮雲散盡月悠悠半夜天涯共此秋杯裏酒光紅似粉
幾分清露濕釵頭

黃曇生

字護花福建閩縣人黃處安女適同邑鄭蕉谿
癸卯進士兗州太守方坤之母也所著有蕭然

居集

劉紹欽黃夫人傳略黃夫人名曇生字護花蕉
溪鄭先生妻也父處安公閩縣諸生明末李自
成破郡屠縣感激上書言平寇方略召授中書
舍人遷工部營繕司主事憤不得施行棄去寄
情書史是時夫人幼日侍几案溫純大雅不爲
閨閣香豔之句處安公喜曰是伏生女曹大家
流必擇快婿既見鄭先生遂受聘年二十于歸
鄭先生故儒家又遭耿逆資生益艱已先生入
期社又倡開社賓儕讌集往往更闢夫人供饌
具必盡歡及先生授徒建寧數赴公車家無儲
三子未就傅夫人黽勉有無時復閉戶升堂作
經師三子侍立如弟子句讀解義各執業退夫
人從堂上聆之書聲盈耳開顏否則惘惘三子
知之亦藉以娛未幾鄭先生令固安邑近日下

濱河多旂地滿洲河兵錯雜擾無已時卒得治
 和鄭先生固有道亦夫人點劑之期年政平招
 戚友滯畿下者至署作竟歲歡除日夫人剪絹
 成梅花插胆瓶奉客偶作小詩諸子競次其韻
 居久之鄭先生罷歸偕返先生歿次子先殂長
 石幢季荔鄉皆成名富文采晚年病目夜課諸
 孫背燈面壁口誦經文漏數刻不倦或以為苦
 夫人曰吾正樂此諸孫皆恂恂守庭訓長孫天
 錦石幢子尤秀出聲藉

甚夫人年七十九卒
 鄭晃蕭然居集序畧蕉溪弟婦黃孺人性端慧
 自鄙齷博極羣書尊甫處安先生負文武畧孺
 人稟庭訓操簡即憂然異人及來歸為儒家婦
 蕉溪歲館旁郡孺人以身總內外歸則剪燭聯
 吟極賓友唱酬之樂迨今從宦固安簪蒿裹布
 無改舊觀以故政績流聞卓然為三輔最暇則
 垂簾課子講業之餘斐然有作然素性沉靜雅
 不樂以詞章名雖余與蕉溪同研席數十載重
 以宗盟窵未窺其一鱗片甲也頃始從諸姪偵
 得之余曰伏女傳書曹昭著誠古之人有行之

者余宗人也孺人言教即身教獨不令書之譜
 中使吾家兒女子觀法乎孺人再三謝余復因
 諸姪固請乃受蕭然居集讀之類皆疏濬性靈
 漱芳傾潤論古具特識綽有良史裁其感物懷
 人諸篇則又怨而不怒樂而無荒蕩風乎葛覃
 卷耳之遺響也孺人則訓辭深厚藹如蔚如以
 才運學即以學化才使列史文苑諸人咸將遜
 謝不敏轉讀易安集彌覺泊乎寡味矣故序孺
 人集而推本言之庶幾導楊休美昭我
 管彤則又不徒一姓一家之矜式也已

讀夫子客吟

妾年甫十餘許君奉箕箒少小聞才名父兄不置口目
 下盡十行胸中藏二酉自從結縭來頗稱琴瑟友光風
 而霽月誰更出君右溢為一石才耻作兒女喁餘技作
 詩人歌成落星斗蕭然四壁立寸舌為百畝連年滯他

鄉抱璞天涯走旅緒與閨情孤恹一樣受風雨寄吟哦
剖來雙魚有檢讀頻挑燈前後疊瓊玖錦囊拂拭開茶
薇露盟手風雅有深情牢騷亦忠厚立言關名教詩史
堪不朽哀號徹九霄蓼莪再續後亂亡傷往事熱血紙
上嘔嚶求友聲披瀝要可久閨房道相思猶復勉井
臼慷慨弔古人雌黃總不苟膽識橫千秋九泉亦點首
一切浮豔訶脫去如塵垢風雲與露月世上堪覆瓿人
羨妾有夫妾愧非君耦

柳腰

輕盈一擲不勝衣誰說蠻娘又楚妃減米未曾祇覺細
多情難遣故消圍嬌來掌上真能舞瘦去風前恰欲飛
想見漢宮春二月空階搖曳影依依

長孫天錦入泮誌喜

桃杏爭妍春日長雛孫喜得掇芹香江峯一曲湘靈瑟
趁此秋期再擅場

家世傳經又一時百無長物此裘箕分甘逸少知何處
料得相聞也展眉

句

不辭嚴督課家世是儒冠

福建通志黃氏工部主事晉良女適固安令鄭善述循內則族戚無間言善述家故貧至鬻婢供滄

灑善述授徒建溪三子皆氏自督課不令就外傳
中子方旦卒長方域季方坤皆成進士晚歲病目
猶口授孫曹書夜分不寢孫天錦復捷南宮嘗
有句云云著有蕭然集以方坤守兗州贈恭人

王氏

江蘇太倉州人相國文肅公女孫編修緱山公

女也適華亭都督太傅徐澹寧著有萬卷樓詩

句

金閨文作市玉匣氣成虹

徐大容閩德紀畧夫人姓王氏太倉相國文肅公
女孫編修緱山公女也年十七來歸性敏毅嗜書
史明大義嘗榜其室內云云以見志太傅公官京
師一切章奏文牒咸經手裁遇節烈事必擊節相
勗太傅公晉秩夫人膺一品封所得俸薪輒勸散
贍族人曰同為祖宗之裔我家以冢子襲職邀榮

何不可使長幼諸從輩均被皇恩
也自是歲以為常著有萬卷樓詩

擷芳集卷之十五目錄

才媛詩

古歛訥菴汪啟淑選

關玉一首

鄭瑜生二首

秦氏句

虞淨芳一首

何氏六首

蕭菱英句三首

王氏十首

熊叶飛二首

吳綃首十九

薛小英一首

陳氏三首

顧文婉二首

劉氏一首

商景蘭四首

商景徽首十一

張氏句

劉運福二首

趙佩芳二首

鮑氏一首

擷芳集卷之十五

古歛訥菴汪啟淑選

闕玉

浙江錢塘縣人以所適非偶抑鬱而卒

悲歌

父生我兮中道以逝母煢煢兮門衰瘁兄嫂難與居兮
抉我如目中之塵沙伊又邁此佻巧兮胡誑我之實多
彼六禮之或已愆兮曾貞女之汝從矧要予以桑中兮
夫豈其為予之匹雙我獨有母兮瘋思泣血我父而有
知兮怒衝髮我兄摩娑兄之金兮骨肉相蔑嫂旁睨之

兮笑言啞啞我忽憤氣兮如雲指漆室女以為正兮又
告夫司命與湘君日子不愛一死兮弗忍速何母之下
世願死而有依憑兮為凶之厲嗚呼哀哉我終死兮魂
獨歸去明告母兮幽訴我父匪我夙夜兮胡然遭此行
露也縱謂行多露兮寧我之污也亂曰嘉名為玉父之
命兮幽辱糞壤終保貞兮憂思悄悄淚淫淫兮蒙此忍
詬日當心兮

陳其年婦人集闕玉錢塘人甲申之歲生十三年
矣容貌端麗又有倍年之覺父母從少絕珍憐之
已父亡獨與母暨兄嫂同居宏光時徵選采女誤
為賣菜傭所給竟嫁其子日令主職爨喂豕稍
暇令鋤泥蒔灌足去縑約頭如蓬葆面目黃黑衣
服泥污玉悲甚仰天痛哭而作歌聞者莫不悲焉

未幾死

鄭瑜生

安徽涇縣人鄭魯玉之女也適葉漢章

病中贈夫

一行詩就幾回愁持贈蕭郎仔細收他日鴛鴦雙舞處
羅幃可憶舊時儔

寄父

思親何以慰愁眉賴得殷勤是古詩那更讀來淇水句
含情又向碧窗啼

矩齋雜記涇州葉漢章之妻鄭氏字瑜生庠生魯
玉之女性潔慧能詩早卒其病中贈夫詩云云又

寄父詩
云云

秦氏

江蘇江陰縣人適黃姓

句

蒲團夜坐三更月懺悔今生未了緣

陳維崧婦人集乙酉澄江之變士子黃姓者妻秦氏被擄不屈過金山題詩壁上末二句云云明日投崖而殞兵去復甦適乳母夫過攜歸復合

虞淨芳

浙江錢塘縣人虞德園女所著有鏡園遺詠

春日有感

燕子雙雙遶畫梁殘紅點點落西廂幾朝別後心如醉
長漏催更欲斷腸

何氏

山東德州人前工部員外郎顯宗之曾孫女故

城秘王伊之室也著有歷亭吟稿

田山薑歷亭吟稿序略夫人生而端莊幼而穎異長而工詩及于歸秘室秉家政則聰明並用雖牙籌縱橫而不廢吟事有昔人經鉏賦槩之風斯亦奇矣迹其由來曾無山川之助風雅之傳閨壺之友而僻處荒村一室千古日摒擋於隄陟登間殆所謂心珠智鏡俱自青蓮慧業中來者耶

秋日

慘淡秋容歛輕烟散野亭遠山橫淺黛歸雁落寒汀
瑟瑟涼風急蕭蕭敗葉零黃昏勞杼柚解事有流螢

小雨

奇峯起膚寸雨意滿巖阿細濕漁人網輕沾樵子蓑
幽蘭香氣淨修竹葉聲多高卧西窗下鳴蟬伴寤歌

初晴

熏風冉冉喜初晴密綠陰陰一望平修竹映窗經雨碧
安榴當檻照霞頰斜陽鴉閃高低影遠樹蟬吟斷續聲
眼底煩襟欣爽豁懷新禾稼也爭榮

九日有感

冉冉籬邊放晚香一番風雨又重陽寒砧夜急斷還續
白髮朝梳愁更長難向深閨覓同調聊隨天籟發清商
竹簾半卷悲秋日日送聲聲北鴈翔

海棠

海棠昨夜綻東風誰把胭脂點碧叢彷彿華清香夢破
玉腮猶自暈潮紅

不寐

永懷不寐數更籌漏滴聲聲點點愁明鏡不須來日照
恐驚白髮已盈頭

蕭菱英

號九華女史安徽池州府人

和藻姑二妹韻

元黃我馬路行遲投宿三更月欲低
么鳳舞聲花悄悄 一雙蝴蝶夢中飛

馬鈴搖落山邊月牛鐸催成枕底詩
姊妹互梳羞對鏡 燈光徧繪影離披

敢言道蘊能吟絮却笑留題無收之句
短情長愁萬種 吞聲不與侍兒知

施環宿舊城和壁間女子蕭氏菱英韵詩方嗟策
蹇去遲遲還怯霜濃壓帽低那禁添愁規剩墨憐
才頓逐雁雙飛博得豪名曹孟德胡笳亦遂有遺
詩人生易作楊枝水並蒂生來風不披白鑑從來

踈骨肉鶯兒幸遇寫微之儂茲
好立雙珠傳南燕啣將何母知

句

梨花初得月柳絮欲因風

藿齋詩集旅邸見九華女史蕭菱英題壁詩有句
云云幽秀可愛為賦二絕題壁誰家咏絮才幽香
襲襲暗徘徊願將寒夜窗前月化作梨雲入夢來
繡閣才華別樣姿梨花夢冷費相思玉人不識歸
何處腸斷蕭娘五字詩

王氏

沈枚臣室詩見香閣流芳集

哭女觀緣

淡掃蛾眉分外妍一生木訥是天然嗟兒撒手西歸去

夢裏何時不往還

九載難填哀怨詞一輪明月伴相知幾回欲破愁腸看
腸斷多應寸寸絲

情債生前欠孰多一心何故轉靡他嬌娃身去情還熱
欲撇偏留奈若何

一一思兒意若抽悔教當日咏河洲堪憐媲美如花鬢
常伴階前鸚鵡愁

可憐珠玉委泥沙女手摻摻學髣鴉

女手雅擅文願得人玉筍之譽

更生能壽考依然向我茁蘭芽

何物堪能返爾魂窟香燃罷可還元戀情嬌小無時歇

馨歎如聞泣戴盆

腰肢渾是怯風寒咄咄書空淚眼看惟有愁心吹不去
一場春夢到槐安

九年愁病却成憨斜倚針樓食不甘一陣花香風送至
方知春色滿江南

甘心茹蘗幾多年口病蘧篔簹實可憐收拾金釵資冥福
皈依天竺早生蓮

兄妹何辜厄閨年兄終妹及豈前緣雙親擱泪何時已
日賦招魂渡願船

熊叶飛

字鳳鳴一字瑤月廣東東莞縣人詩見嶺南五朝詩選

閨情為瑤雪作

歡愁不定意遲遲別有幽情綠水湄玉手折來提上柳結成如意寄相思

春情

行樂芳春日正長人情宜暖又宜涼幽窗綠樹鶯啼處要是情人解斷腸

吳綃

字素公一字片霞號冰仙江蘇長洲縣人通判

水蒼女適當熟進士許瑤著有嘯雪菴詩

陳維崧婦人集虞山許太守夫人吳片霞有詩才其梨花雙蝶一詩世尤誦之詩曰如玉雙雙透瑣幃鏡中斜見粉依稀西施舞罷春衫冷道韞詩成柳絮飛影過杏梁朝日澹夢醒巫峽片雲歸梨花深院無人到不是開籠放雪衣

圖繪寶鑑吳綃字冰仙吳門人觀察許瑤夫人書工小楷詩有刻稿復善花卉鈎染設色俱佳

葉襄嘯雪菴詩序吳夫人名綃字素公一字冰

仙家世三讓之苗裔歸高陽許氏壬辰進士蘭

陵之配幼敏慧好書丹黃不去手善繪事每經

點綴靈動如生所居墳籍塞坐吟詠清婉吳中

閨秀徐小淑能詩文端容善畫一時有盛譽惟夫人兼此二長或謂過之也性至孝二尊嘗有疾刺血書禱輒愈蘭陵多內寵夫人撫愛如同生時稱有鵲巢之德焉為文磊落有俠氣已而好仙嘗偶遇異人示以前因居恒道服不為俗世粧梳泊如也家有古琴閑夜好風月時撫弄

終夕不倦冷泠作雅操不為繁手淫聲尤工絲
 竹管絃諸雜技靡不盡其妙性靜耽奕不惜玉
 鈿寶釧聞者有賭却釵頭玉步搖之句誠閨闈
 之絕才彤管所僅見也有嘯雪菴集一卷行世
 沈裕題吳冰仙長吟圖詩閨中之秀林下之風
 望古遙集寄懷無窮綠窻斐几朗詠容容語吐
 珠璣韻曼絲桐傳
 播千秋是日女宗
 小粉塲雜識長洲閨秀吳冰仙嘯雪菴集詩多
 清新尚有梨花白燕賦頗佳附錄于此其賦云
 有靈禽兮變元質而被素衣愛庭花之皎皎穿
 粉蕊之霏霏纖鈞欲墜輕雲乍歸風裏斜回拂
 湘簾而影疾宵來遙認映瓊砌而光微散玉鈿
 之千點逞纖腰之一圍漢主幃中照夜光于趙
 后劉王帳裏玩積雪于甘妃李成蹊而詎此鶴
 舞市而還非一枝麋鹿臺邊夷光獨立並住鳳
 凰樓上弄玉雙飛漢珠燦爛洛袖依稀乃有瓊
 樹後庭桂梁蘭室乍裂霜綃初逞皓質霓裳剪
 剪疑從釵上飛來麝月娟娟直是眉心捧出臨
 旭影而不消隱香叢而頓失簷畔身輕枝頭香

幽蘭頌

審青禽欲到東方朔自許多知柳絮虛吟謝道
 韞應慙思拙安仁大谷蘭成小園年芳地勝日
 暖春暄睇雕甍而擘掠賀廣夏而翩翹豈比啖
 黃花而報德栖梓樹而含冤涅而不淄白非日
 浴值孫和水晶如意獼髓難求倚滿奮琉璃北
 窻瞻光空促脉脉盈盈森森菽菽惟皚皚之相
 依似余心
 之無欲

青青載榮被彼江臯君子服之德音孔昭

題芙蓉圖

秋路淨如拭木末披芙蓉輕紅蕩曲渚密影連芳叢流
 照日色冷乾聲天宇空苔磯若雲綴水澈魚相從襜褕
 白雪羽顧影蒼烟中仙人吹鐵笛響激生淒風溯洄兼

葭側麗景看無窮

春遊百泉

仲月春始和遠郊阡陌靜數里聞水聲豁然入靈境桃
李猶含萼森肅長楸勁淪漣映紅玉蘋藻浮青鏡太行
亘天末遙瞻似雲靚溯流尋神源圓折紛珠迸喁喁見
魚樂鱗鬣自適性善病久罷歡暫使心目瑩至哉蘇門
人今古誰與并

烏生八九子

秦家好門巷團團桂樹高雌雄雙宿桂樹間九子相逢
聲嗷嗷阿母何處覓食哺烏子烏子可憐被鶻捎啄烏

目食烏腸嘴如鈎矛翮如刀騰身直上凌青霄阿母歸
來不知烏子處雌雄遶樹空勞勞徒戀主人桂樹好豈
知此地難安巢南山巖石多雲霧舊居欲歸愁路遙

秋意

相如綠綺秋絃急霜侵樹影寒皎立塘水泠泠湘佩清
遙山翠澹巫娥泣嘖嘖蟲吟四壁空千金賦得長門宮
含毫思苦朝來渴病骨生春蜀酒濃

題山水圖

丹崖蒼岑玉磊珂青雲紫霧深凝瑣峯頭卧虎沒金髻
澗底眠龍抱珠顆瀑布虹懸千仞餘碧溪如縠週迴邏

悠悠日月仙人家籬邊亂落琪花朶陰濃灌木影參差
烟深叢竹青婀娜古寺踈踈度遠鐘籜風葉雨秋聲夥
春晚曲
棟花風起春如醉海燕勞勞雲碎碎湖頭兩槩白晝閒
莫愁深下珠簾睡筍生斑玉柳生絲陌上人歸草似烟
轆轤聲促銀牀冷玉井飛紅墮碧泉

銅雀伎

霸業山河在三臺不復春當時望陵處松柏亦成塵舞
袖閒雲薄紅顏野草新曾聞王子敬道此最關人

嘯臺

魏晉已如夢荒臺今尚存龍虵正交鬪鸞鳳自高騫避
俗惟長嘯逢人常不言始知真隱意何必入桃源

題香月舫

咫尺壺中地幽居是所宜仙枝香藹藹碧月影遲遲琪
樹藏鶯密名花帶蝶移低牆圍粉色輕幌惹烟姿庾信
魚成寸王恭柳吐絲盆梅橫寫影庭草碧含滋宛轉通
蘭閣遲回繞翠墀氤氳花氣襲蕭瑟竹聲吹閣小惟容
膝窻虛稱畫眉蜀琴清素手鄂被擁凝脂豈止容桃葉
猶堪舞柘枝傳籌拋小令刻燭課新詩西母桃留核餘
杭酒在卮鏡鸞金玳玳箏鴈玳參差招隱還成賦抽毫

漫進辭仙村迷不遠洞府到堪疑宿雨聲飛夜朝歌欲
起時未須蘭作楫只合繡爲楣夢繞江南處烟雲去不
知

虞美人花

逸艷驚人一簇明石邊池畔總盈盈倚風啼露朱顏薄
動碧翻紅舞袖輕春酒覺餘猶有暈楚歌何處斷無聲
朝來恨欲成堆裏誰喚君王舊賜名

韓信城

乞食王孫因此中當時跨下辱英雄萬家淪滅邱墟改
數尺陂陲雉堞空兵出陳倉紛逐鹿勢窮雲夢倏藏弓

將軍不解謀身策鍾室徒勞憶蒯通

詠相思鳥

南粵春深花未殘羽衣身暖錦成團佳名莫與離人說
綵色惟教繡女看丹實啄來妃子咲素枝啣去楚臣歎
霜縑擬寫相思態應爲傷心下筆難

三岡識畧吳綃字冰仙姑蘇人許參政之室也幼負才藻善詩畫所著有嘯雪菴集嘗記其咏相思鳥詩云云咏雙蝶詩云云讀此二詩其才調風情不言可知矣

咏雙蝶

韓憑夫婦兩魂狂來往闌前亦自忙晴日試調粧後粉
春風新換舞時裳餐多芳蕊鬚猶醺睡穩花枝夢亦香

欲與何人透消息等閒飛過宋家牆

月夜

春生繡陌花盈路露洗長空月滿天碧樹錦香桃李徑
畫橈金錯木蘭舡窗前風動常含暈樓上霜寒幾度圓
蟾影照來千點白桂叢生出一鈎偏陳王歌徹人千里
陶令情多繡領邊涼魄最宜烟冉冉織條惟稱蝶翩翩
冰痕透影花枝冷小瓣沾衣月點媽染作素光疑粉色
熏和香氣帶沉烟刀環消息經年在錦段功夫逐日鮮
從此常爲花下客也知人是月中仙

秋海棠

花發珊瑚樹微紅著粉腮夜深嬌不睡須待月光來

懷古

公子翩翩信絕倫擬將豪舉却狂秦不知賓客成何事
枉殺樓前斬美人

海棠

可似朝陽酒困時春風乍暖欲開遲烟啼露泣無人見
惟有紗牕明月知

白芍藥

素面不須誇號國濃薰何用竊胡香元暉堦下當春見
從此令人薄艷粧

薛小英

浙江山陰縣人

無題

昨夜懷人綠瑣窗燈枝如粟吐銀缸風聲入樹驚棲鶻
月影移花閃睡龙撫枕應知腸斷九窺簾猶憶目成雙
玉奴不省當年約枉乞春絲繡佛幢

蓮坡詩話半邨與予交最善相依園土中晦明風
雨刻意苦吟半村嘗有句云狂飈無影摧花散夢
雨成陰障月昏又五夜料難成好夢兩年應未定
驚魂又塞翁得馬機先伏楚國亡猿禍且隨又詩
惟寫意隨唐宋酒借陶情任聖賢蓋不衫不履多
自得之趣及與余無題倡和諸作不緣人似梅花
淡肯繫情如春水濃夜月樓臺楊柳笛春風簾幙
鳳凰裙則又清麗芊綿矣半村嘗為余言山陰女

子薛小英詩詞兼擅以所適非偶
抑鬱而死小英有無題詩云云

陳氏

章安馮元鼎妻著有繡佛齋詩稿

美人春怨

嬌歌一曲陌上花閨中少婦怨春華嫁得長安遊俠子
看花見月嘗成嗟嗟儂顏貌空如玉郎又求妻金作屋
香銷燭落淚偏長明月窺人羞獨宿獨宿迢迢夜似年
隣家秉燭夜調絃絃聲嘹亮還淒楚一回一聽一潛然
潛然淚洒只長愁世路崎嶇多伎求君不見籬下陶潛
歸去蚤邊庭李廣不封侯

久不會諸妯偶聚於得月樓

鏡裏朝朝生白頭偶逢佳會暫登樓已曾繫縷邀春燕
且自忘機逐海鷗明月入簾風澹澹青山相對水悠悠
一樽喜值身俱健世事榮華漫轉求

曙窗

雙峯掩映小樓前樹影窺櫺一枕偏喚醒愁人無箇事
數聲啼鳥落花天

顧文婉

江蘇無錫縣人侯漢儀之母也

陳維崧婦人集無錫顧文婉自號避秦人詩詞極多恒與王仲英相倡和詞見倚聲右集

惜春

東風吹骨試輕羅人對梨花喚奈何獨坐攤書聽漏永
滿庭風雨落紅多

寒詞

小屏人靜玉笙寒一點殘燈伴漏闌為愛焚香消夜永
滿庭明月不會看

劉氏

劉佐臨女著有紉蘭軒詩

新月

宿雨夕方歇雲間天氣清星河仍欲淨涼月復來迎簾

捲花初好螢飛火自明
虛簷移坐久新茗聽新聲

商景蘭

字媚生浙江山陰縣人
商等軒先生長女祁忠

敏公之配也有二媳四女
咸工詩夫人每暇日

登臨則命媳女輩載筆牀
硯匣以隨角韻分題

一時傳為勝事

婦人集會稽商夫人以名德重一時論者擬于
王氏之有茂宏謝家之有安石

陳維崧商夫人集序高柔室內正有賢妻荀粲
房中非無令婦扶風宅第惠班則才擅大家金

卯家庭令嫺則名高三妹冬釘夜煥採筆以
吟椒春陌晨鮮展蠻箋而咏絮固勝洛陽道上

只解採桑非徒蜀郡壚頭惟能賣酒泊乎降乍
以暨同牢張子高畫眉之暇即事觀書楊子幼

鼓瑟之餘便思染翰加以姊原道韞標名德於
區中女是左芬扇風華於膝下一門才媛商雲

衣獨矜秀善之稱兩姓賢甥祁湘君蚤得清新
之譽堦前鄭婢並習風詩座上濟尼尤長辭令

篇章間作燃脂而玳瑁千函倡和時聞拂素而
琉璃萬軸傳粉熏香之暇字字庾徐玉釵羅袖

之中人人江鮑况復翟泉鵝出關河之愀愴何
多陳寶雞鳴身世之感傷不少夜月歸寧則太

傅之池臺安在秋風憶舊則尚書之榮載都非
涉綠野之空園入烏衣之短巷殘山剩水頓成

今昔之觀伯姊諸姑畧說興亡之事借班管以
描愁托銀箏而訴恨此則韓娥蕩魄情因激楚

而彌工衛女銷魂詞
以悲哀而入妙也

送別黃皆令

徵調起驪歌悲風遶座發人生百歲中強半苦離別會

君客會稽釜不因人熱今唱歸去詞佩環攜皎月執觴

指河梁愁腸九迴折流雲思故島倦禽厲歸翮帆檣日以遠膠漆日以闊索居寡蘭臭誰當和白雪交深多遠懷憂來不可絕竚立望滄波相思烟露結

關山月

秋月開金鏡浮雲散碧空風吹榆戍北露濕柳城東影滿驚烏鵲光沉起塞鴻秦關今夜色應與漢宮同

贈閨塾師黃媛介

門鎖蓬萊十載居何期千里覲雲裾才華直接班姬後風雅平欺左氏餘八體臨池爭幼婦千言作賦擬相如今朝把臂憐同調始信當年女校書

過河渚登幻隱樓哭夫子

久厭煩囂避世榮一邱恬淡寄餘生當時同調人何處今夕傷懷淚獨傾幾負竹窻清月影更慚花塢曉鶯聲豈知其結烟霞志總付千秋別鶴情

商景徽

字嗣音商太傅等軒之次女也適徐徵君咸清著有詠雛堂詩草

西河詩話閨秀商嗣音與女徐昭華皆有讀瀨中集詩嗣音詩云云又云云昭華詩云騰脂花落覆紅蠶獸頸初垂火自含坐對西河才子句渾如秋月照澄潭又云少小曾觀白日詞蘆中人去竟如斯溧陽浣女空相殉悔不先吟瀨上詩四詩皆絕作惜予不敢當耳驚人對仗近人

所少若蘆中一章則尤所刺心者不知閨中何以能惜賢如是也嗣音名景徽會稽商太傅女為上虞徐大司馬次君仲山之配與其姊郝中丞夫人女姪雲衣皆能詩有聲後昭華尤好子詩遂師子時雲間張錫懌有詩云弟子如蘇蕙先生類馬融子邑任辰旦詩云誰知詠絮堂前女猶是扶風帳裏人張遠詩云甲門傾國富文華曾向毛萇授五車皆指其事餘見子傳是齋受業記

美女篇

美女東城隅紅顏華灼灼垂垂十二鬟一一飛金雀初日照樓臺春遊出宛洛采桑攀遠揚拏芳擗叢薄行路何踟躕中心諒有託不知誰家子白馬黃金絡強言立道傍翩然互酬酢本非淇上姝寧踐桑中約家無薄倖

兒白頭負前諾贈妾雙明珠還君抵飛鵲日暮行歸來空閨守寂寞

邯鄲才人嫁為廝養卒婦

妾自承恩初同心綰雙結燦爛若明霞流塵不能涅晨眺漳河流夜卧叢臺月豈知中道乖蛾眉坐淪沒春風伴赭衣秋霜改元髮鏡臺寶髻踈羅裳暗香歇願作巫陽雲朝朝反宮闕

送觀雅二姪之襄陽合卷

三月垂楊夾岸新畫船爭送畫眉人岳陽樓遠仙源路鳩鵲橋通湘水濱玉鏡影移雙鳳侶翠幃香煖百花春

裁成博議思鄉切須寄魚書慰老親

子夜四時歌

蠟燭照空帷春宵難達曙衿衣不著綿預識中無絮
弄水恐湔裙采蓮畏傷手花欹半面妝願得花間藕
栖烏夜不眠肅肅翻金井五更霜月昏不見雙桐影
五彩織薰籠爐灰皎如雪不棄炙殘香為愛心中熱

讀毛西河瀨中集作

芙蓉露下小池秋金鴨烟消宿雨收為讀西河新句好
都梁艾蒨滿妝樓

彩筆翩翩映玉臺頻將繡帙向風開可憐杜甫驚人句

不數陳留曠世才

弔張曼殊

覓得溫柔在帝鄉嬌花容易萎嚴霜豐臺自此遊人絕
芍藥將開盡斷腸

雲髻峩峩似洛神都人爭學百環新憑他學盡新粧巧
不是才郎收淚人

西河詩話江南贈弔曼殊詩文頗少以生死皆在京也獨錢唐吳寶崖徐東建叔姪丁素涵諸君各有輓詩若閨秀則會稽商嗣音四絕尚存其首章云云末章云云始寧徐昭華亦存四絕今選其二附徐都講詩

張氏

山東鄒平縣人王吏部士祿配也

句

海邊休恨還留滯獨喜離鴻得共聞

陳維崧婦人集王吏部夫人張鄒平總憲文定公之孫亦擅詞賦西樵官萊子時嘗作寄內詩萊子淹留我共君滯人春月復秋雲巡檐幾夜頻搔首海國鐘聲已厭聞夫人屬和未二句云云後王官國博貧不能攜家每咏此未嘗不嘆其有思也

劉運福

安徽宣城縣人光祿卿楷之女也適文學梅琢

成著有峽猿吟焚餘稿

沈廷璠峽猿吟序峽猿吟者余表弟梅子文常哭其內子劉孺人作也孺人識大義遇事隨力

自盡初歸文常數日即親中饋執婦道唯謹出奩中資佐不足無恹容每戒從婢曰慎毋少縱恣吾欲而婿讀書于此可與俱勿急歸也因遣人告舅姑舅姑許之嗣後孺人時從文常歸省往來于舅姑父母之間體羸善病姑太孺人恐其不起常語人曰吾仲婦孝敬勤儉勉有無以持門戶脫不宿將若何病劇急欲返故廬文常難之正色曰及今不返將復何待苟不聽而令吾奄逝于此其瞋諸瀕行喜形于色曰其或者得假餘年俾長操井曰乎平日愛買禽魚放生人以急告每脫簪珥周之而尤加意于親黨失意之人喜讀小學內則諸書見古賢媛輒效慕恐後閒工吟咏有林下風致歲癸未文常同余及澎起讀書靈山僧舍孺人常貽札文常謂日月易邁肄習宜勤其居恒儆戒相成之意類如此

天逸閣望敬亭

名山屬望處霽色正當樓野樹連天碧孤雲繞塔浮泉

聲雙鏡落嵐氣一窻收素抱丹邱志無緣作勝遊

牡丹盛放喜大姑歸寧

魏紫姚黃舊有名高臺綽約爛盈盈東風微動香俱透
曉日初臨色更新幾載離情神易合一朝談笑樂無倫
花前良會緣非淺綠酒清樽著意傾

趙佩芳

浙江仁和縣人大司空殿最公會孫女適侯補
縣丞吳熙祿著有聽秋窗稿

春日西泠橋謁先慈墓

陰雨連朝喜乍晴西泠橋畔奠慈親平湖綠水生波細

遠岸輕舟喚渡頻葛嶺爭傳梅早放蘇堤又見柳初新
眼前風景堪圖畫何用逍遙學散人

寄大姆

分袂于今已六春鱗鴻有便信來頻故園風景仍如昨
宦况平安慰老親

鮑氏

江蘇丹陽縣人也

詠溪鍾

溪外聲徐疾心中意斷連是聲來枕畔抑耳到聲邊

隨園詩話丹陽鮑氏女自稱聞一道人遭難流離
嫁竟陵陸黃雲年二十四而天咏溪鐘云云頗近

禪理昔朱子在南安聞鍾聲矍然
曰便覺此心把握不即此意也



知前風友致
無常轉世典
...

...

